

四庫全書

史部

欽定四庫全書

史部

畿輔通志卷六十七

詳校宣容御史臣劉人睿

檢討臣德生覆勘

總校官進士臣繆琪

校對官中書臣葉蘭

謄錄監生臣張元任

欽定四庫全書

畿輔通志卷六十七

名宦

名不可以虛作况守官治民其尊顯者大節必有徵於朝野其卑散者遺愛必有被於閭閻宜乎公論彰明而不可以為偽矣然取諸舊史者得其實為易而取諸郡州縣志者得其實為難蓋非名實顯見末由登於國史而史作於異代其心平故其事信若郡州

縣志則並世有司之所為耳其識之明未必能辨是非之正而恩怨勢利請託又雜出於其間則虛構疑似之迹增飾無徵之言以欺人於冥昧者不少矣高邑趙忠毅公有明一代可計數之君子也同時宦於畿輔風節治行見於公文而確乎有據者凡二十餘人而郡縣舊志無一及焉觀其所不載則載者可盡信乎欲削其所疑則非小善必錄之義且無以辨其非真欲別求其可信則不與公同時及同時而未見

於公文者又絕無可考以是推之欲賢者之不遺而無實者不得冒濫豈易言哉雖然愚而不可欺者民也官必有迹每見一州一邑三數百年中吏之仁暴污潔智愚士大夫皆能口道焉又其近者山農野老能指名焉中人之冒濫或久而莫辨若顯悖於所聞衆必譁然而摘其實此傳所稱有所有名而不如無有者也故余志名宦自元以前一以舊史為斷自明以後姑仍郡州縣志而見於忠毅之集者乃不以著

於是編蓋一人之文一郡一時之事特千百之十一耳載之則所漏實多故具列其所以然俾他日有司之為志者知怵然為戒詳酌於民言而達於史官又以見忠直循良之實必博求之君子之言信而有徵者毋專據有司之方志而仕宦者之子孫慎毋虛美其先人而轉以自播揚也

總部

陶唐

而糧不絕以五千八百戶益封

張

敞

平陽人宣帝時冀州部中有大賊拜敞為刺史時廣川王不道賊皆遁入王宮敞自將郡

史園守王宮得之殿屋重轅中懸其頭王宮門外敞居部歲餘賊盜禁止

朱

博

字子元杜陵人成帝時拜冀州刺史方行部吏民數百人遮道自言從事自請且留此縣

錄見諸自言者博駐車決遣四五百人吏民大驚後博徐問果老從事教民聚會博殺此吏州郡畏威

朱

浮

字叔元光武時幽州牧屬風迹收士心辟諸郡士置之幕府贍其家

馬

成

字君遵南陽人世祖即位拜揚武將軍屯常山中山以備北邊築堡壁起烽燧在事五六

年以勤勞徵還邊人上書求請復遣還屯及南單于保塞北方無事拜為中山太守領屯兵如故

鄧

訓

字平叔新野人顯宗永平中理滹沱石白河令通漕太原轉運所經沒溺死者不可勝算

建初三年拜訓謁者監領其事訓上言更用驢輦歲省費億萬計全活數千人

郅

壽

字伯考汝南西平人舉孝廉遷冀州刺史時冀郡多封諸王賓客放縱不檢壽按察之無

稍客貸視事三年冀土肅清

左

雄

字伯豪南郡涅陽人安帝時舉孝廉遷冀州刺史州部多豪族好請託雄閉門不與交通

奏案貪猾二千石無所回忌徵拜議郎

周

舉

字宣光汝陽人順帝時舉茂才為冀州刺史正身率下風俗頓革

蘇章

字孺文平陵人順帝時冀州刺史故人為清河太守章行部案其姦賊為設酒肴陳平生

好甚歡太守喜曰人有一天我獨二天章曰今夕蘇孺文與故人飲者私恩也明日冀州刺史案事

者公法也遂舉正其罪

第五種

字興先長陵人永壽中以司徒掾使冀州廉察災害舉奏刺史二千石以下所刑免甚衆

還以奉使稱職拜高密侯相

蔡行

字孟喜汝南項人桓帝時冀州刺史中常侍貝瑗託其弟恭舉茂才行不受又中常侍曹

騰弟鼎為河間相賊罪千萬騰使梁冀為書請之行不答鼎竟坐罪

羊陟

字嗣祖太山梁父人桓帝初以高第遷冀州刺史廉察貪濁所在肅然

朱

穆

字公叔南陽宛人桓帝永興元年百姓流移冀州尤甚懼穆為刺史令長聞穆濟河解印

綬去者四十餘人宦者趙忠喪父歸葬偕為瑤璵玉匣偶人穆下郡案驗吏畏其嚴明發墓剖棺陳尸帝聞大怒徵穆詣廷尉輸作左校太學生劉陶等詣闕訟寃乃赦出之

范

滂

字孟博汝南人舉孝廉桓帝時冀州饑荒盜賊羣起乃以滂為清詔使案察之滂登車攬

轡慨然有澄清天下之志所舉奏莫不厭塞衆議

賈

琮

字孟堅聊城人舉孝廉拜冀州刺史舊典傳車駝駕垂赤帷裳琮升車言曰刺史當遠視

廣聽糾察美惡何反垂帷以自掩塞乎乃命御者塞之百城悚震諸賊過者望風解印綬去

劉

虞

字伯安東海郟人舉孝廉遷幽州刺史百姓感其德化咸歌悅之黃平初拜甘陵相綬撫

荒餘以儉率下遷宗正後叛兵攻破清河朝廷以虞威信素著復拜幽州牧虞到薊罷省屯兵務廣

恩信賊

衆降散

皇甫嵩

字義真安定朝那人平黃巾賊有功拜左車騎將軍領冀州牧奏請一年田租以贍饑民

百姓歌之

晉

張華

范陽人武帝時持節出督幽州諸軍事招納遠人四境無虞士馬強盛

山濤

字巨源河內懷人有器量介然不羣為冀州刺史甄拔賢才三十餘人皆顯名當時

魏舒

字陽元任城人拜冀州刺史以簡惠稱

衛

瓘

字伯玉安邑人秦始中除征北大將軍都督幽州諸軍事於時幽并東有務桓西有力微

並為邊害瓘離間二寇務桓降力微憂死朝廷嘉其功賜一子亭侯瓘乞以封弟

唐

彬

字儒宗鄒人武帝時持節監幽州諸軍事訓兵勸農拓邊境千餘里百姓感慕為立碑頌

德

劉

弘

字季和沛國相人武帝時以寧朔將軍假節監幽州諸軍事甚有威惠寇盜屏跡四境帖

然

丁

紹

字叔倫譙國人懷帝時為廣平太守政平訟理轉冀州刺史率州兵破汲桑有功加寧北

將軍監冀州諸軍事為政嚴肅人畏愛之紹自以才足為物雄慨然有董正四海之志時王浚荀晞

並感紹視二人蔑如也永嘉三年卒策贈車騎將軍

邵

續

字嗣祖安陽人元帝中興棄石勒歸晉拜左將軍冀州刺史後為石虎所執使續降其城

續呼其兄子竺等曰吾志雪國難以報所受不幸至此汝等努力自勉勿以二心其部曲推其子緝王為

劉

琨

字越石中山人永嘉三年拜都督并幽薊三州諸軍事與段匹磾約為兄弟同獎王室元

帝中興加琨太尉後為匹磾所害追謚曰愍

段匹磾

鮮卑人永嘉中領幽州刺史為石勒所敗朝服持節見石虎曰我受國恩志在滅汝不幸

至此不能為汝敬及見勒亦不為禮卒遇害

王克

秦符丕時為平東將軍平州刺史固守博隣與慕容麟相持城破被執大罵不屈而死

南北朝

陸俟

代人仕魏世祖為冀州刺史時考州郡治功惟俟與河內太守邱陳為天下第一

源賀

秃髮儁檀之子魏高宗時為征南將軍冀州刺史賀上書言自非大逆赤手殺人之罪其

坐賊及過誤之愆應入死者皆可原命謫守邊境是則已斷之體更受全生之恩徭役之家漸蒙休息之惠刑措之化庶幾在茲高宗納之久之謂羣臣曰源賀勸朕宥死刑徒克北蕃生濟之理既全邊戍之兵有益御等事朕人人如賀復何憂哉錄賀治為第一在州七年徵拜太尉

封回

渤海蔭人魏安州刺史徵為太尉長史行定州事肅宗即位授平北將軍瀛州刺史時寇

亂水潦百姓困乏回表求賑恤免其兵調州內賴之

元雲

魏景穆帝子封任城王顯祖時拜冀州刺史性善撫綏留心政事甚得下情合州請戶輸

絹五尺粟五升以報雲恩高祖嘉之

李平

頓邱人魏世宗時拜長樂太守政務清靜吏民懷之尋以平兼冀州儀同開府長史甚著

聲稱仍除正長史太守如故

李韶

字元伯狄道人魏肅宗時為冀州刺史清簡愛民甚收名譽肅宗嘉之就加車騎大將軍

轉定州刺史二州境既連接百姓素聞風德不言而治

元字

魏臨淮王潭曾孫孝昌中拜冀州刺史境內稱為慈父隣州號曰神君後為葛榮所執與

兄祐爭死榮曰此魏之誠臣義士也皆免之榮平還除冀州刺史

裴延雋

字平子聞喜人肅宗時為幽州刺史修復督亢渠及故戾陵諸堰溉田百萬餘畝百姓賴

之又修起學校禮教大行在州五年考績為天下最

元澄

魏任城王雲子字道鎮為定州刺史民苦橫調前守未能除澄多所減省貧人欣賴

楊津

華陰人魏孝昌初以散騎常侍行定州事尋加北道大都督受命出至靈邱賊起博陵定

州危急遂回師南赴時州軍新敗津以士衆勞疲移車入城賊果夜至見柵空而去其後賊攻城津開門出戰斬賊帥一人殺賊數百賊退人心少安詔加吏部尚書北道行臺賊圍州城津盡力捍守作地道鑄鐵以灌賊賊相語曰不畏利槩堅城惟畏楊公鐵星後賊帥葛榮誘降津大怒斬其使長

史李喬引賊踰城津苦戰不敵遂見拘榮破始得還洛

封隆之

渤海蔣人魏時四為冀州刺史每臨部州中舊齒咸曰我封公復來其得物情如此

高液

北齊神武第五子武定中為滄州刺史轉都督定州政化為當時第一徵為侍中有老公

數百人相率具候曰自殿下至郡五載人不識吏吏不欺人惟飲此鄉水未食此鄉食聊獻疏薄液

重其意為食

高叡

北齊高祖從子文宣受禪封趙王出為定州刺史領兵監築長城盛夏在途屏除蓋扇與

軍人同勞苦無水處禱而掘井泉源湧出號曰趙王泉云

于

翼

字文若太師燕公謹之子周大象初拜大司徒仍除幽州大總管詔翼巡長城立亭障西

自雁門東至碣石創新改舊咸扼其要先是突厥屢寇燕代間士農失業自是不敢犯塞百姓安之

隋

趙

嘏

字通賢天水人隋文帝時為冀州刺史有威德嘏嘗有疾百姓爭為祈禱冀市多詐嘏為

銅斗鐵尺置諸肆百姓便之有人盜嘏田中蒿為吏所執嘏曰刺史不能宣風化彼何罪也賜盜蒿

一車盜愧過於重刑

長孫平

字處均洛陽人開皇中為貝州刺史有善政

裴

肅

字神封開喜人開皇中貝州長史有能名仁壽中見太子勇蜀王秀僕射高颯俱廢黜遣

使上書上曰裴肅憂我家事此亦至誠也徵入朝

張 暉

字士鳴河間鄭人開皇中兩為冀州刺史吏人悅服稱良二十石

唐

李元通

藍田人高祖時拜定州總管為劉黑闥所破愛其才欲以為將元通曰吾當守節報主烏

能降志從賊耶賊囚之元通給守者曰吾能劍舞可借刀守者與之仰天太息曰大丈夫撫方面不

能保所守尚何視息耶乃潰腹死

羅士信

歷城人高祖初封鄆國公從秦王擊劉黑闥洺水上得一城語諸將孰能守此士信曰願

以死守乃命之賊悉眾攻雨雪救軍不進城陷不屈而死謚曰勇

狄仁傑

字懷英并州人武后時拜幽州都督賜紫袍龜帶后自製金字十二以旌其忠

宋

璟

幽州都督有威名

張守珪

陝州人開元初為幽州良杜府果毅時盧齊卿為刺史器之引與同榻曰不十年當節度

是州後果為幽州長史守遷破賊朝廷嘉之詔立石紀功

李光弼

營州人乾元初加幽州大都督後封臨淮王

馬燧

字洵美汝州邾城人德宗時魏博節度使田悅圍邢州詔燧救之大破悅軍斬首萬級邢

園解以功遷尚書右僕射兼魏博招討使悅復與朱滔王武俊連和出兵背城燧復破之

張

徹

范陽府監察御史長慶元年府軍亂殺從事而囚其帥且相約獲徹置之帥所徹出門罵

衆曰汝何敢反不絕口而死事聞贈給事中

張孝忠

初為李惟岳將去逆歸順德宗擢為成德軍節度與朱滔攻敗惟岳於東鹿滔欲乘勝襲

恒州孝忠曰恒州多宿將迫之則鬪緩之則改圖吾堅壁以待賊滅耳月餘王武俊果斬惟岳以獻後滔與武俊叛遣蔡雄說之答曰業已効忠不復助惡滔悉兵攻之帝詔李晟實文場率師來援滔去解

田弘正

盧龍人忠孝畏慎為魏博節度使封沂國公元和間詔命韓愈撰其先廟碑詳人物

溫造

并州祈人德宗時署節度叅謀使幽州說劉濟濟流涕願率先諸侯効死節穆宗時又為

幽鎮宣諭使賜緋衣至范陽
論劉總籍所部九州入朝

王承元

成德節度使承宗弟也承宗死穆宗詔使慰軍授承元節度使北鎮以兩河故事脅誘承

元不受命承元曰諸軍固愛我然格天子詔我獲罪奈何斬不從命者軍乃定承元去鎮左右囊器帶自隨承元使空褚毋留入朝昆弟拜刺史者四人位於朝者四十人

李愬

字元直長慶初帥魏博時幽鎮亂殺節度使田弘正愬素服令軍中曰魏人富庶而通於

大化者田公力也上以其愛人故使移治鎮人不道而戕害之父兄子弟受田公惠者何以報之衆皆哭又以玉帶寶劍遺牛元翼曰此劍吾先人常以翦大盜吾又以平蔡姦今鎮人逆天公宜用此平之也元翼感謝曰敢有不承而愛其死力者有如此劍乃下令軍中勒兵以俟

田布

字敦禮弘正子弘正遇害穆宗拜布魏博節度詔討幽鎮牙將史憲誠脅軍叛布為書謝

帝曰臣觀衆意終且負國願速救元翼毋使塗炭河朔引刀刺心而絕贈尚書右僕射

盧弘宣

字子章武宗會昌五年為義武節度使性寬厚而難犯詔賜粟三十萬斛貯飛狐弘宣計

輓費不能滿直勅吏守之會春旱命軍隨意往取秋斂償之境內足食

王處存

萬年人僖宗中和初為定州制置使遷義武節度黃巢陷京師處存不俟詔分兵二千衛

乘輿詔處存督戰每語輒流涕軍中多處存義愈為之用素善李克用遣使十輩曉譬迎勸卒共平

京師

五代

王彥章

鄆人也梁末拜澶州刺史遷北面行營招討使為人驍勇軍中號王鐵鎗與晉夾河而軍

晉人以鐵鎖斷德勝口築河南北為兩城彥章舉鎖燒斷之以巨斧斬溪橋遂破南城後為晉人所

執不屈
而死

趙德鈞

同光中鎮蘆臺軍因其地產鹽課民自辦仍置榷鹽院貿易於瀛莫間民甚賴之

李

瓊

周安州防禦使治郡寬簡民立碑頌德

韓通

太原人周世宗時城李晏口束鹿鼓城祁州博野十餘城且有戰功

陳思讓

周安國軍節度使有善政及代還官吏者艾詣闕請留

郭進

深州人周顯德中洺州團練使有善政郡民請立碑頌德詔左拾遺鄭起撰文賜之進嘗

於城西植柳壕中種荷郡民見之有垂泣者曰此郭公所植也

宋

韓令坤

武安人有才畧識治道與太祖同事周世宗情好親密鎮常山凡十年北邊以寧

馬仁瑀

大名人開寶四年遷瀛州防禦使兄子嘗因醉誤殺平民繫獄當死民家自言非有宿憾

但過誤爾仁瑀曰我為長史而兄子殺人此怙勢非過失也不敢以私親亂國法遂論如律

曹瑋

彬子太宗時守天雄以威愛相濟吏民安之契丹使過戒其下曰曹公在此毋縱騎馳驅

楊延昭

太原人本名延朗高陽關副都部署智勇善戰號令嚴明與士卒同甘苦遇敵必身先克

捷則推功於下故人樂為用在邊二十餘年契丹憚之目為楊六郎

康保裔

洛陽人真宗時為高陽關都部署契丹兵大入保裔率精銳赴之為契丹所圍或勸易甲

以遁保裔曰臨難無苟免此吾効死日也大呼決戰而死

王承衍

字希仁雍熙中知天雄軍契丹南侵候騎至冀州去魏二百里城中震恐時上元承衍下

令張燈設樂與賓佐
晏遊達旦衆賴以安

何承矩

太宗時為制置河北緣邊屯田使自順安以東瀕海廣袤數百里悉為稻田有莞蒲蜃蛤

之饒民
賴其利

劉

福

下邳人雄州防禦使為政簡易人甚德之諸子嘗勸起大第不許既死上聞之賜其子白

金五十兩
使市第宅

李

斌

青州人淳化中領洺州團練使勤於政理人服其清後徙滄州吏民不忍其去鄰境亦以

狀聞詔
書褒美

王能

定陶人咸平中知靜戎軍建議決鮑魚澗長城口水注雄州塘水為戎馬限方舟通漕以

實塞下景德中為行營都部署護城祁州躬率丁夫不離役所帝手詔褒美

寇準

字平仲下邳人景德中知天雄軍契丹使過謂曰相公重望何以不在中書準曰主上以

朝廷無事北門鎖鑰非準不可

王魯

益都人天聖中莅大名凡舊政有不便者委曲彌縫悉掩其非吏民感悅復知天雄軍契

丹使者往返斂車而過無敢譁者人樂其政畫像祠之

杜衍

山陰人知天雄軍為治謹密不以威刑督下而吏民亦憚其清

陳堯咨

字嘉謨堯佐弟知天雄軍自契丹修好城壁器械久不治堯咨葺完之仁宗時復知天雄

陸辭上特賜金魚以示優渥尋
改判澶州令行禁止境內肅然

韓

琦

相州人慶歷八年以河朔地大節制弗專特
徙鎮定武軍兼安撫使琦考李衛公法為方

圓銳三陣以閱士攻守奇正坐作進退悉有法度
由是定兵精勁冠河朔歲大歉賑活饑人百萬建
學舍課諸生遇賢士必以禮四方聞風而趨者日
益盛嘗夜作書令一卒持燭於旁卒他顧燭燃公
鬚公袖拂之而作書如故軍中感服及去定
人遮留設祖哭聲動野刻德政三十條於石

狄青

字漢臣西河人寶歷初徙正定路副
都總管沈勇有智畧邈圉恃以為安

趙抃

西安人仁宗時為武安軍推官人有赦前偽
造印更赦而用者法吏皆以當死抃曰赦前

不用赦後不造不
當死讞而生之

王德用

鄭州人慶厯二年帥定州契丹常使人覘其軍威或勸執之德用曰吾軍整而和使覘者

得實以歸是屈人兵以不戰也

周沆

益都人英宗時進樞密直學士知成德軍俗方棄親事佛沆按斥數千人還其家

歐陽修

字永叔廬陵人慶厯三年知諫院保州兵亂以修為龍圖閣直學士河北都轉運使賊平

大將李昭亮通判馮博文私納婦女修捕博文繫獄昭亮懼立出所納婦女

司馬光

陝州人仁宗時舉進士除定武軍從事和易近人不立崖岸人敬而慕之

呂公著

壽州人以資政殿學士拜定州路安撫使謝表曰進不敢希功而生事退不敢弛備以曠

官世傳誦之

任布

河南人哲宗時知成德軍或欲省河北兵布言契丹西夏方窺伺中國備未可弛築甬道

屬漕沱河

跨絕泥潦

趙士晤

字公美濮安懿王曾孫從徽宗北遷遁還抵武安招集義兵入洺州城治壕壑樹鹿角勵

將士死守飛大砲碎敵攻具以計生得其首領敵乃解圍去以功遷洺州防禦使建炎二年金人再攻洺糧盡援絕衆乃擁士晤赴行在

陳淬

莆田人宣和四年授正定路馬步副總管七年金人入正定淬以孤軍禦之妻孥八人皆

遇害

陳邁

字亨伯江寧人登進士第欽宗立拜河北都轉運使歷知中山河間府金人再至詔康王

領大元帥邁弟光祿卿適臨城諭旨邁遂語之曰
主辱臣死吾兄弟平居以名義自處寧當賣國家
為囚孥乎適泣曰兄但盡力勿以弟為念邁將括
兵出戰步將沙振衷刃入府害邁於堂并及其子
錫妾婢奴僕共十七人振出帳下卒譟而前曰大
敵臨城汝安得殺吾父執而摔裂之身首無餘城
中無主乃開門出降金人入見邁屍
曰南朝忠臣也斂而葬諸鐵柱寺

劉

身

靖康初為正定府路都鈐轄金人來攻身率
衆晝夜搏戰城上金人初攻北壁徙攻東城

宣撫使李邁趣身東應金兵還薄北城城遂陷邁
就執身巷戰顧其弟曰我大將也其可受敵戮乎
潰圍欲出諸門已為敵守
乃之孫氏山亭中自縊

宗

澤

字汝霖義烏人靖康元年除河北副元帥康
王開大元帥府於大名澤履冰渡河與金人

十三戰皆捷金人呼為宗爺爺

李

邈

字彥思臨江人拜河北制置使守正定邈至兵不滿二千錢不滿二百萬自度無以禦敵

乃諭民出財死守募民為勇敢亦數千人新集之兵無鬪志被圍四十日城破邈見執拘於燕山府邈乃削髮為僧金人怒遂遇害臨死顏色不變事聞高宗謚曰忠壯

李

政

建炎初授河北將官駐冀州金兵來攻政守禦有法人皆用命俄攻城甚急呼曰事急矣

有能躍火而過者重賞忽死士十數人皆以濕糞裹身躍火而過大呼力戰金人敗走未幾政死城陷權知州單某者不屈亦死之

遼

韓德樞

延徽子為遼興軍節度使釐紛剔蠹勸農桑興教化民獲蘇息後遷平灤營三州觀察使

耶律休格

南京留守均戍兵立更休法勸農桑修武備及南北和好休格戒戍兵無犯宋境馬

牛逸於北者悉還之境內大治

耶律仁先

南京留守恤孤惇禁姦惡宋人畏之議者謂自裕悅休格後惟仁先一人而已

竇景庸

中京人大安初授武定軍節度使審決冤滯輕重得宜以獄空聞拜中京留守

趙徽

析津人舉進士為武定軍節度使及代去民上章請留

金

大臭

遼陽人天會中為河間路都統時已克河間實然怒其不早降縱軍大掠矣諫止之已掠

者官
為贖

伯特塔哩布

奚王五族人天德中洺州防禦使正隆
盜起無兵不能禦乃引水注壕以為固

盜非能近州賴以安為政簡靜不積
財凡調官車一乘僕婢數人而已

圖覓坦繹

州上京達河人尚熙宗女滿國公主遷隸
州防禦使以政蹟聞升臨海軍節度使

巨構

字子成平谷人章宗時累遷橫
海軍節度使以鎮靜稱詳人物

張行簡

日照人大定時進士第一章宗朝為順天軍
節度使上書曰比者括保州官田給軍分撥

已定有欲更換者輒從其請紛擾無已忽彼忽
此爭端日滋臣請限以日月不許為便利曰可

賀揚庭

字公叟濟陰人明昌初為洺州防禦使時歲
歉民饑揚庭諭蓄積之家出所餘以糶饑者

獲濟

伊喇富森

明安人以蔭補令史累功遷順義軍節度使部內明安穆也掠民婦女歲之窟室富

森率衆入索之得婦女四十三人穆也抵罪

賈少冲

字若虛通州人天眷中調營州軍事判官再遷武定軍節度副使海陵失道少冲乃不求

仕詳人物

元

張文謙

邢州沙河人王文統為中書平章文謙為左丞屢相可否文謙遂求出宣撫大名臨發語

文統曰民困日久不量減稅賦何以憫之文統曰稅賦減損何以供給文謙曰百姓足君孰與不足

於是抵任闕常賦什
之四商酒稅什之二

史

楫

中統元年授正定路總管同判本道宣撫司
事楫謹身率下明教化信賞罰任賢良汰貪

墨恤荒獨舉文學
三十人後皆知名

耶律特默

契丹人正定路安撫使武仙犯正定特默
與其家孥陷焉仙遣其僕劉攬兒持書誘

其子天祐曰汝能誅趙州官吏當活汝父母不爾
烹之特默密令攬兒語天祐曰忠孝難兩全汝能
固守我視刀鋸甘如蜜矣天祐慟哭受命以賊書
示史天澤天澤曰王陵之事照輝史冊汝能遵父
命忠誠許國功
不在王陵下

賀仁傑

京兆鄠人也至元十七年上都留守缺宰相
擬廷臣十數皆不納上顧仁傑曰無以易卿

僧格奏上郡留守司錢穀多失實召留守呼喇呼及仁傑廷辨仁傑曰臣漢人不能賊吏姦臣之罪呼喇呼曰臣為長印在臣手臣之罪上曰世之讓爵者有之若爭相引罪鮮矣置勿問仁傑留守二

十餘年
請老卒

王

磐

永年人世祖時為正定等路宣慰使有西域大賈恃勢干官府直來坐廳事指麾自若磐

叱左右掉下筭之會蝗起朝廷遣使者督捕役夫四萬人磐曰捕蝗本為民今反以病民耶使者怒責磐狀期三日盡捕蝗磐不為動用法督捕不三日而蝗盡使者驚以為神

賀勝

仁傑子也嘗從許衡學通經傳大義大德九年父仁傑請老代為上郡留守通商賈抑豪

縱進左丞相上柱國留守如故民德之為立祠帝命工寫像以賜後為丞相特穆德克誣殺百姓爭聚

屍傍哭焉至正間詔雪其寃追封王謚曰忠宣其子惟賢亦以大中大夫同知上都留守司事云

達爾瑪實哩

字遵道恰爾巴氏也幼穎敏經史過目輒領解歷官上都留守車駕歲臨幸供

應率預辦不以擾民蒙宗巨室及宿衛人有暴橫者必繩以法毋敢犯者焉卒謚忠敏

張孔孫

隆安人至元二十八年歷肅政廉訪司莅大名以所沒贓糶粟五千斛賑飢民有獻故河

堤三百餘里於太后者即上章謂宜悲還民從之

劉肅

字才卿洛水人世祖居潛邸以尚書為邢州安撫使與李惟簡協心為治滌蠹散去貪暴

流亡復業戶增十倍

張耕

邢州安撫使州舊萬餘戶兵革之後不滿數百耕及副使劉肅善於撫綏流民復業遂陞

邢為順德府又興鐵冶行楮幣公私兩利
裕宗嘗曰安得治民如邢州張耕者乎

李惟簡

邢州安撫副使先是劉秉忠張文謙言於世
祖曰今民困敝莫邢為甚盍擇人往治之於

是選尚書劉肅及簡
往不期月戶增十倍

丁好禮

正定人元末命好禮與郭庸留守京師明兵
入城或勉其謁大將好禮叱曰我以小吏致

位極品今老矣惟一死耳後數日
明將召之昇至齊化門不屈而死

郭庸

中書省叅政與好禮同為留守城破明將召
至衆叱之拜庸曰各為其主死自吾分何拜

之有遂
遇害

明

徐達

鳳陽人洪武初以大將軍平定北都元主遁去不戰而克籍府庫收版圖寶器禁戢軍士

人民安業市肆不易人謂曹彬下江南已延入臨安不是過也後留鎮燕薊以平灤榆關等處土地曠行乃於古遷安鎮築城置關控制險要更名山海關內外截然屹為重鎮其西若喜峰古北等隘葺壘築塞衛安軍民在鎮十七年功烈甚偉其後山海衛民請立廟報功巡撫李賓李進等先後請於朝詔報可成化中廟成賜額顯功

劉真

合肥人官都督僉事傅友德守燕上言關外新附之地宜厚加存撫設險守要命真及指

揮使李彬往視之真至畫形勢築亭障配兵戍守邊民得寧居焉

劉崧

吉安人洪武初為北平按察司副使每夜篝燈讀書旦起視事時當兵火後招徠逋竄慰

安反側務寬厚以存大體民甚賴之

暴

昭

浮山人洪武中由國子生授大理寺司務累官刑部尚書建文初充北平採訪使密請備

燕及靖難兵起設北平布政使於正定昭以尚書掌司事與鐵鉉輩悉心經畫尋召歸金川門陷被

執不屈
磔死

張

曷

澤州人洪武中舉人材累官工部右侍郎建文帝即位以曷為北平布政使受密命伺察

燕事元年七月燕王將起兵會朝廷遣人逮燕府官校王偽縛官校置庭中將付使者紿曷入至端禮門為伏兵所執不屈死時與曷同死者都指揮使謝貴指揮彭二又長史葛誠伴讀余逢辰護衛指揮盧振皆先後殉節死

劉

經

洪武時以功陞北平都司賜寶劍銅牌靖難兵起經抗節不從他將獻城經陞井不死成

祖賜蟒玉以旌其節
經死賜祭錄其子孫

趙

昉

字雲翰河南人永樂中官禮部尚書帝巡邊顧隆慶保安川原嘆曰自二州民內徙至今

尚皆荆棘耶因遷內郡人實之命昉經理昉至檢土田創廬室定立市廛開導藝植三四年間士庶安輯商旅交至遂成都會

張

貫

永樂中順天府尹政尚寬平獄無壅滯吏民德之

王

賢

字惟善寧陽人永樂中順天府尹府民以柴炭夫役為病賢言於工部為減十之七時中

官恬寵非法賢執奏
寘於法京兆肅然

于謙

字廷益錢塘人宣德四年以御史巡視長蘆鹽政捕馬船夾帶私鹽不避權貴悉置之法

河道為之一清

譚廣

字仲宏丹徒人正統間佩鎮朔將軍印鎮守北邊所統部曲鮮明是耀進止有節敵望見

曰此譚家軍也輒引去在鎮二十餘年兒童婦女皆知其名

李

儀

涿州人正統初宣鎮始設巡撫命儀以右僉都御史往時軍府草創儀規畫具可法守廉

潔持正遠徵信畏尋以忤權貴被逮死鎮人寃之嘉靖初建昭德祠春秋致祀

劉璉

江寧人永樂壬辰進士正統時以戶部侍郎總督宣府等處邊儲叅贊軍務凡二十八年

區畫周詳糧芻克足致仕歸

章珪

常熟人任監察御史正統初巡按正定等府有寬獄二十一人立辨釋之人服其明畿甸

蝗災民饑有司請以虧欠馬匹折追糧米為賑濟珪曰賑濟正以為民若追折欠民何以堪具疏以

免聞悉

薛希璉

浙江麗水人正統十年以刑部侍郎巡撫正定懲墨契廩誅詢民瘼招撫逃移設法賑恤

至今稱頌不衰

鄒來學

字時敏麻城人宣德癸丑進士英宗北狩來學巡撫薊鎮廣斥堠儲財用舉將材守要害

畿輔賴為長城

孫安

字景康左府都督同知正統己巳獨石馬營等八城失守議者欲棄之于少保譙曰棄之

不但宣府懷來難守京師不免動搖乃薦安授以方畧安率兵度龍門關且戰且守八城完復如舊乃相築壑臺教諭種植事便軍民者次第舉行

羅亨信

東莞人永樂甲辰進士正統五年以右僉都御史巡撫宣鎮已巳土木之敗遷城多臨朝

議復召鎮兵入衛人心益皇皇欲棄城走亨信以忠義激勸仗劍坐城門令曰敢出城一步者斬衆始定城中歡呼曰吾屬生矣因設策捍禦敵知有備引去城賴以全

陳泰

字吉亨邵武人景泰元年以僉都御史提督紫荆關馬等關鯁介執法聲稱凜然考察官

吏咸當人心

李秉

字執中曹州人正統丙辰進士景泰三年以右僉都御史巡撫宣鎮時緣邊耕地荒蕪秉

請白金三萬兩市牛山東給俵播種秋成大稔乃益招流徙起學舍清屯田劾逸將巽懦者每有條奏詔下諸逸傲行之

葉

盛

字與中崑山人正統乙丑進士天順八年巡撫宣鎮初盛以叅政協贊獨石諸營軍務築

城八置堡七百邊關賴之及為巡撫復官牛官田之法墾田積穀歲有奇羨益市戰馬繕城堡屹然

稱雄

鎮云

閻

本

字宗元闕中人進士天順中擢僉都御史撫薊門有貂璫怙權擅斂掾史舞文憲本盡法

處之因是被
詭稱疾致仕

彭

韶

字鳳儀莆田人天順丁丑進士成化中以副都御史巡撫順天居官務大體陳時政以弭

天變議糧運以便
軍民尤多切時宜

楊繼宗

字承芳陽城人天順元年進士歷官僉都御史巡撫順天時有宦戚佔民產繼宗追還之

星變上疏
忤旨左遷

楊

兆

膚施人由僉都御史撫薊陞總督和輯軍民悉心邊務政暇灑墨為竹極烟雨之態令撫

署有其
遺筆

解延年

棲霞人天順間進士由戶部員外郎督三衛軍儲捐俸建衛學士民德之

張

海

成化初順天府丞時中官用事勢燄灼人海以禮自持不少為屈坐此外補

張

憲

成化中任順天府尹望警權豪德孚士庶稱京兆之賢能者必歸之

張諫

畢節人成化中任順天府尹修建學宮規制大備以躄直請太僕寺卿

余子俊

四州青神人景泰辛未進士成化間以尚書兼都御史總理宣大邊備修馬政通鹽利又

定屯種之規宣大便之子俊正不詭俗庶不近名嘗語人曰凡有建樹即近小亦須為百年計大臣謀國遇有利害當以身任慎勿養交市恩遠怨自全也

秦

紘

單縣人景泰辛未進士成化十八年以僉都御史巡撫宣鎮凡事利軍民必力行之無所

避忌明年敵入順聖川紘率兵邀擊之大有斬獲捷聞遷副都御史

徐懷

字明德嚴州人天順庚辰進士孝宗初以副都御史撫薊時畿內大荒懷疏請京通薊三

倉米五萬石發下州縣驗口俵給又疏借內帑充糴以備後患畿民賴之

馬中錫

字天祿故城人成化乙未進士弘治九年以右副都御史巡撫宣鎮甫下車劾貪弁數人

風紀肅然更嚴禁例杜請託凡芻蕘工匠馬匹之利為世家所擅者悉還之官或曰公所為適以府

怨中錫曰某志不敢負君民即賈禍奚悔後遷去

劉福

重慶人成化己丑進士以山東按察副使備兵天津營造衛城有能名

張錦

岷州人成化己丑進士歷官右副都御史巡撫宣大公廉勤慎興革利病不俟朝夕龍門

萬全等學燬於兵奏請重設由是遷徽咸知嚮學

王雲鳳

字應韶山西和順人成化甲辰進士以右副都御史巡撫宣鎮至則戢猾胥劾貪帥理預

備倉行保甲法疏劾錢寧張銳之姦天下尤壯之尋以憂去

張 鑒

松江華亭人成化十年以右副都御史巡撫正定等處莅事嚴厲郡縣官貪殘者悉置之

法所在興利除害豪猾屏跡尤注意學校士民歸心

魏 富

巡撫順天中貴人多操利匿亡將領守臣倚以為援富至悉繩以法一時無敢犯者

陳 諤

順天府尹政尚嚴察嘗出行誤衝皇太子駕太子訴於上上曰陳府尹是我父母官竟不

問

李 介

字守貞高密人成化己丑進士弘治元年以右僉都御史巡撫宣大明達正直諸生有勤

於誦習行伍有勇於戰鬪者出贊激勸文武士翕然感奮焉

劉大夏

字時雍華容人天順甲申進士累官戶部侍郎弘治初北邊糧芻告乏命大夏經理瀕行

周尚書經謂曰邊上糧芻半屬中貴子弟經營公此行毋以剛取禍也大夏曰處天下事以理不以勢俟至彼圖之甫至召父老日夕訪求盡得根柢揭榜云某倉場缺糧芻若干每石束給官價若干官員客商願告報者米十石芻百束以上俱准蓋住時市易法告報必百千石以致豪家牟利爭相轉買自此法立倉場遂有餘積邇人謂三十年僅見云

洪

鐘

字宣之錢塘人弘治中以副都御史巡撫薊鎮築邊牆繕城堡自山海抵居庸凡二百七

十餘處減防秋官兵六千人歲省輓輸萬計

張

欽

字敬之順天通州人正德六年進士以御史巡視居庸關武宗將出關幸宣府欽上疏諫

不報帝微行至昌平傳開關甚急欽謂分守中官劉嵩曰車駕將出關是我與君死生之會也關不

開違天子命當死關開車駕出萬一有如土木我
與君亦死等死寧死不開關乃命指揮孫璽閉關
納門鑰歲之頃之帝召璽璽曰御史在臣不敢擅
離更召嵩嵩曰我上家奴也敢不赴欽因負勅印
手劍坐關門下曰敢言開關者斬秉燭草疏奏未
達使者復來欽拔劍叱之曰此詐也使者懼而返
曰張御史幾殺臣帝大怒命朱寧捕殺御史會閣
臣等追至沙河而欽疏亦至帝乃歸又二十餘日
欽巡白羊口帝微服疾馳出關數問御史安在欽
聞追之已不及復疏諫而帝命谷大用守關人不
得出欽感憤西望慟哭於是

世傳張御史閉關三疏云

劉源清

字汝澄東平人正德甲辰進士歷官左僉都
御史巡撫宣鎮繩豪猾吏劾貪污官旌獎忠

烈興起學校汰冗食革濫
用廢舉隆修遠近寧謐

李浩

字師孟，曲江沃人。順天府尹時，逆瑾擅政，無名之需求，無厭浩。一切裁抑，數面議，可否侃侃。

不阿

周璽

順天府丞，逆瑾柄國，錦衣楊玉附之，權勢薰灼。文移乘式，璽峻拒之，瑾怒，杖於朝者三卒。

不為屈

楊博

字惟約，蒲州人。嘉靖己丑進士。二十七年，總督薊遼保定軍務。巴圖爾及岱爾誇遜十萬騎。

攻薊鎮，博探甲登陴，督諸軍力戰，斬獲無算。又募死士持火器，夜驚其營，一夕四五起，敵自相蹂躪。

比明悉遁去，論功加太子少保。

馬應龍

嘉靖時為霸州道，慷慨有大節，斷獄明敏。紀綱振肅，大寇巨奸相繼剪除。陞四川按察使。

軍民詣闕請留事
下吏部尋卒於官

陸

坤

蘭州人官霸州道州苦水患為開新挑河民
賴之又力白前守趙應式之寃除判官孫文

中之險公論大快百
姓立思功祠祀之

周復俊

霸州道武備修飭盜不入境修州志建學宮
立文明書院俱捐錢為之毫不取辦於民尋

以憂去民
追思之

陳策

官霸州道每出巡禁絕廝傳惟市餅數枚飲
茶一甌而已署中例有供用器具封識一室

及去以匙授州守曰此可
以待後來毋重累吾民也

溫景葵

字汝陽太原人自霸州道移永平兵備
約束軍衛寬嚴相濟居民賴以安枕

毛

愷

字達和江山人嘉靖壬辰進士為天津道津俗少淳朴競魚鹽萬竈沿河而居日相以戈

矛為事又皆中官親屬遇有犯法輒齎金脫之最難治愷秉法不少假貸三年習俗大變

王世貞

字元美太倉人嘉靖丁未進士為大名兵備道釐定婚禮民至今守之大名郡小於正定

供億維均世貞力爭魏民賴之出廬柙於縲綫拔魏允中於儔伍尤為曠舉

譚

綸

宜黃人隆慶初總督薊遼保定軍務疏請設薊鎮三營分駐密雲遵化三屯以戚繼光總

理之復請築敵臺三千自居庸東距山海斥堠相望遣備大飭

戚繼光

登州人隆慶初為薊州三鎮總理建烽臺千二百座立軍門制拒馬器設輜重營以南兵

為選鋒衛兵主策應本鎮兵專戍守節制精嚴軍容為諸邊冠繼光在鎮十六年薊門晏然居民得

安耕
牧

白棟

榆林人隆慶辛未進士萬曆中任昌平兵備道廉潔自守著有善政部民構祠肖像祀之

彭國光

字用卿德化人進士萬曆間為天津道峻潔明敏遇事有肩荷量裁驛遞整理海防尤稱

有裨
軍國

劉澤深

字警圖扶溝人萬曆辛丑進士任永平兵備道治政剛決人莫敢干以私其所興革皆大

利大
害

許應達

由進士萬曆中任昌平兵備道停止礦稅捕賊盜賊除暴清蠹軍民懷德建祠祀之

曹愈參

涪州人進士萬曆中任昌平兵備道撫民恤軍利必興害必革民立祠祀之

孫應元

號華山湖廣人進士任永平兵備時僉民糴

者四十餘家賙恤貧士加意學校邊徼
險阻皆躬自檢覈立除虛冒軍衛斂手

周啓元

字仲先福建海澄人萬曆辛丑進士天啓元
年任通州兵備道有惠政州人立祠祀之後

以忤魏
璫罹害

邵可立

商邱人萬曆戊戌進士以部郎備兵薊州別
奸蘆蠹綜覈驛傳軫災折糧至今利賴轉霸

州道士民泣
送七十里

左光斗

桐城人萬曆丁未進士以御史出理京畿屯
田上三因十四議詔悉允行水利大興北人

始知藝稻改理學政執法衡文權貴不敢干私
涿州置水田數百頃贍貧生並給八府鄉試卷永

為例又請開武學以教諸生射
刻無才錄與文並與人競起距

申用懋

吳縣人進士天啟五年以副都御史巡撫順
天鎮兵缺額餉八十餘萬節署內陳設減官

厨費以助之課後圃植蔬自給議開薊
河通遵化便民就糧以忤魏璫罷職去

胡士容

湖廣廣濟人萬厯庚戌進士天啟六年由部
郎任薊州兵備道均徭剔蠹增修城堡以不

附魏璫被逮
士民冤之

耿如杞

館陶人進士天啟時授遵化道巡邏至喜峯
口守璫方為魏忠賢建生祠趣如杞入謁如

杞半揖而出璫怒啖黨劾之下獄刑慘備嘗坐賊
數千遵人李素義憤激烈願代以死並罹杖責璫

敗起撫

山西

陳其柱

蘇州人萬曆癸丑進士天啟中任昌平兵備道廉介不阿時魏忠賢勢正張一日謁陵衆

皆甫畝郊迎其柱獨不往及入館舍又不為謁遂挂冠去

鄭國昌

號天符邠州人進士崇禎元年任永平兵備道軍興旁午供應不缺明年城破有勸出亡

者國昌厲叱之公服西向再拜曰臣力竭臣罪不可贖矣先令妻子縊死乃從容自盡事聞追贈太

僕寺御從祀表忠祠

張春

陝西同州舉人自刑部主事備兵永平執法不阿移病歸崇禎二年復起永平兵備收復

永灤嚴禁屠掠全活甚衆

盧象昇

宜興人天啟壬戌進士崇禎初知大名府擒斬巨盜馬翩翩擢兵備道流寇入畿南象昇

屢邀擊之斬首無算象昇每戰恒先士卒刃及於
鞍失馬以步鬪或督戰而酣旁晚他騎距躍上奪
其刃便以擊賊賊見輒駭曰此盧
閻王遇即死由此相戒不敢犯

吳阿衡

字隆微裕州人進士崇禎初由寧夏道擢順
天巡撫性嚴毅吏民望威屏息有饗弁投匭

欲以三百金獻阿衡阿衡硃筆大書
顯示却之復加法處聞者莫不股慄

劉曰梧

南昌人以僉都御史巡撫順天除弊興利拔
裨將孫顯祖數戰有功軍聲大振檄各屬分

建義倉買穀備賑在任
六年引老板留戴道

孟學孔

武昌人進士任大名道遼州邑雋士日課之
得其指授者咸擬科名至練士卒飭武備尤

有羊杜
之風

焦馨

章邱人進士任大名道政執體要風裁振肅李司寇元白稱其未嘗建營壘以示威而威

著未嘗以名法馭下而下畏未嘗以
慘礫繩民而民不敢犯時稱確論

范志完

虞城人進士任永平道增城堡覈驛傳鼓舞行伍作興學校任事三年百廢俱舉陞山西

撫巡

劉景耀

號嵩曙登封人進士任永平道時詔遣中官閱兵橫甚景耀獨不往謁督師孫傳庭所部

不守紀律景耀不令入城傳庭怒欲
中協將以法景耀不為惕事旋解

蔡懋德

長洲人以叅政備兵正定天久旱尺寸土皆焦懋德禱雨輒應屬邑民爭迎之禱所至即

雨民歡呼曰兵道雨與巡按李模同心為政訪求
利病不三月興除殆盡陞山西巡撫闖賊破城

殉節
死

楊

廉

字方震農城人任順天府尹以文學飾吏事不茹柔吐剛惟省煩屏苛為務輦轂多私人

能禍福人雖誅求不遂然皆知其悃素共稱為有道竇興之歲原其理而峻其防擗節諸費舊號舍

用葺盡易以木為經久計

呂

獻

字伯文新昌人先任應天府丞庶事煩劇專決不留改順天其煩劇倍應天而裁決益裕

李

瓚

崇禎中以副都御史巡撫順天築長城堡城募兵設隘勞績著聞賜白金文綺進尚書

高

銓

保定巡撫立九則以編徭後時有奸民以民田獻為皇莊者上遣侍郎往勘寃聲撼野銓

曰上雅愛小民必不忍奪其生業以利左右堅請還民為業

孫瑋

保定巡撫別蠹廣儲摧強撫弱卓有風裁時
濬沱水溢衆勸乘船以避瑋不可第擇署中

稍高處居之曰水至此惟有死
既而水果及床而退人服其度

傅宗龍

字括蒼昆明人進士由太僕少卿任順天巡
撫時將悍兵驕當事恒以不戢為患宗龍勤

訓練廣儲積謹斥捩
精器械軍伍肅然

張鵬雲

字雨蒼陽城人進士由太常少卿總傅宗龍
為巡撫一依宗龍舊政軍民輯睦邊境以寧

知縣孫康同申請革除一切
敝政鵬雲從之民尤感德

汪應蛟

易州兵備有鑛璫熾甚露章劾之畿稍熄尋
撫保定開葛沽水田歲得米數萬石又因歲

飢請減歲額六
萬利在民生

姚孫渠

桐城人進士以御史備兵大名政務簡靜而丰稜不可犯屬吏無敢干以私者去後士民

追思之

王永吉

高郵人進士崇禎十四年任通州兵備道按地編丁按丁征徭民困以甦歲旱設法勸賑

全活甚衆擢山東巡撫去之日民為立祠

丁魁楚

永城人進士任大名道喜談兵尤尚儒雅獎拔經生與部署行伍交治不懈吏畏民思後

陞巡撫順天都御史

楊國柱

字廷石遼東人精騎射由百夫長不十年以軍功佩鎮朔將軍印總兵宣鎮以廉靜慈惠

為務崇禎十五年與本朝大兵戰于松山以衆寡不敵身被六鎗面中三矢

死事聞贈卹賜祭建祠歲祀額曰旌烈

馮師孔

字若魯原武人進士崇禎初由正定知府擢兵備道十五年監通州軍事時都城戒嚴勤

王兵四集往往殺良以冒功師孔按諸營冒者抵死自是良民得保首領尋命巡撫陝西流寇入城

死 殉節

朱之馮

字樂山宛平人天啟乙丑進士崇禎末巡撫宣鎮時流寇已破寧武之馮率衆登陴設太

祖位誓衆死守檢朱衣一襲授從官曰有不幸以此裏我賊入城左右擁之行之馮曰離此一步無死所矣乃易朱服南向叩首自縊死詳見忠節

徐標

號鶴洲臨清人天啟乙丑進士崇禎末巡撫保定建言修練儲備四事詔頒示所在舉行

十七年闖賊逼郡遣人持偽牌至標大怒碎之斬其使部將謝嘉福暗與賊通劫標西迎標大罵不從至城西門

交刃而死

金毓峒

字鶴沖完縣人崇禎甲戌進士以御史奉命監軍扼畿南要害乃馳至保定倡義誓衆為

固守計甲申三月城陷投古井死詳見忠節時保定知府何復同知邵宗元指揮劉忠嗣皆死之並

祀忠烈祠

朱廷煥

字中白山東單縣人崇禎甲戌進士大名兵備道有政蹟甲申三月寇急為書報父誓必

死偽將軍劉宗敏傳牌諭降廷煥碎牌斬使集紳民固守發大炮擊賊多死傷城破被執不屈死康熙四十四年知縣金

天定請建祠祀之

本朝

張存仁

字定真正黃旗世職浙江人順治七年總督三省駐節大名剪榆園巨寇畿南以寧庚寅

詔令考校守令文藝存仁躬蒞各郡命題面試居官廉幹者有一二語通曉即注上等否則文雖佳

亦乙之監司請其故存仁曰我武臣也

朝

廷命

我校文我第考實文有偽實難欺也衆皆歎服康

熙初崇
祀名宦

李蔭祖

字繩武遼東人順治十一年任三省總督正定西山久為寇踞地險難於用兵蔭祖諭井

陘道陳安國入賊巢撫之渠魁高三出就撫涕泣輸誠卒為勇將畿北歲饑民多流亡多為道瑾蔭

祖疏請安集並請免逃人連坐之令康熙二十五年崇祀名宦

苗澄

任縣人旗籍順治十八年由侍衛授啓心郎
歷僉都御史總督河務節制瀛海激濁揚清

整肅部伍晉兵部

尚書總制四川

朱昌祚

山東人旗籍康熙四年三省總督練習治體
洞達民情凡所興革不徇己私下執偏見人

咸服其公明卒謚勤愍康

熙二十五年崇祀名宦

王登聯

奉天人康熙初巡撫直隸和平鎮靜興革悉
當吏恪民懷與總督朱昌祚同以圜撥事獲

罪後蒙一體

贈卹崇祀名宦

甘文焜

豐城人康熙初任直隸巡撫陞雲貴總督吳
三桂謀逆抗節不從全家殉難

贈兵部尚書謚

忠果

金世德

字孟求遼東鐵嶺人康熙五年招撫閩海有功擢副都御史巡撫直隸周咨利弊有以紛

更進者世德曰民生安危視乎督撫大法小自庶民安物斯阜倘喜事邀功顧名思義謂巡撫何請設總理錢穀刑名兩監司賦無逋冒獄鮮幽沈漳水滹沱桑乾諸河皆泮流秋漲沒民田八萬畝有奇積年苦徵輸世德再疏請豁卒得捐除後以病請致仕奉

旨慰留力疾視事者二年及卒予祭葬謚清惠崇祀名宦

于成龍

字北溟永寧州舉人器識弘深操守廉介始仕州縣即以遠大自期當滇黔用兵與當事

策戰守機宜事多奇中歷任府道臬藩政績顯著康熙十九年陞直隸巡撫奏免宣屬水衝沙壓田糧嚴禁下屬讐訐上官惡習賑恤饑民核定驛站兵餉清保甲善偵緝盜風從此衰息商民咸安良

法善政後皆遵守
聖祖仁皇帝眷遇隆厚奏朝上夕

可

賜詩賜馬賜金寵賚優渥後陞兩江總督其治一如撫畿

時卒謚清端兩省並崇祀名宦雍正十一年奉

特旨入祀賢良祠

格爾古德

滿洲人康熙二十一年任直隸巡撫明斷
有為整法度舉廢墜事雖瑣細必躬親之

而體自存畏懷兼至翁有同聲卒
謚文清康熙五十五年崇祀名宦

于成龍

字振甲奉天人由廕生任樂亭知縣遷知通
州以于清端薦陞江寧知府轉安徽按察使

康熙二十四年巡撫直隸政嚴貴近有犯必絕以
法釐剔蠹弊如改徵狐皮折色免追淺夫工食停
止灰車協運革除芝麻花絨雜派善政不可枚舉
任縣水荒地數千頃產去糧存累民尤甚成龍據

知縣王原祁申詳為之

題請豁除民困以甦轉河道總督三十七年復以總督

管直隸巡撫事民慶再來有大小于公之頌尋陞
兵部尚書兼右都御史總督河道卒

賜謚襄勤康熙五十年

崇祀名宦祠

郭世隆

奉天人康熙二十九年任直隸巡撫立身廉潔處事鎮靜嚴以懲貪猾寬以安良善屬吏

奉為楷式督州縣建義倉買穀備賑未雨綢繆功施尤偉陞雲貴總督去至今民追思之

李光地

字晉卿安溪人康熙庚戌進士由兵部侍郎督學三輔以經術勵士子文體一軌於正巡

撫直隸正身率屬畿內諸河悉由天津入海下流壅塞水多潰決光地次第經理引渾河別從柳岔口出築子牙河堤使濬沱不得橫溢棄土盡為沃壤馬廐經界與民地相錯奉

命遣八

旗都統會勘光地以方田少廣法籌之一夕定疏請以地給民輸其稅田賦以清陞太宰拜大學士

卒謚文貞崇祀名宦雍正十一年奉

特

旨入祀賢良祠

魏象樞

字環極蔚州人順治丙戌進士康熙二十一年以刑部尚書巡察直隸民瘼官箴親為詢

天

語慰勞褒嘉至再卒謚敏果崇祀名宦傳詳人物雍正

十一年奉

特

旨入祀賢良祠

熊伯龍

字次侯漢陽人舉順治己丑會試第一提督順天學政崇尚實學釐正文體丹黃甲乙手

自評定鑑別精當苞苴不行

士風為之振起卒祀名宦

許汝霖

海寧人進士康熙年以禮部侍郎督理子牙河務有築隄浚河功居民德之祀青縣名宦

祠

宋文運

南宮人順治乙丑進士康熙年由光祿御陞順天府尹杜請謁絕交際事有不便於民者

革除殆盡畿甸肅清進刑部侍郎卒
謚端愍崇祀順天府名宦傳詳人物

趙良棟

寧夏人康熙十二年任天津總兵整什伍勤簡練嚴以一號令誠以待士卒精熟陣法乘

機決策莫識其謀望重海內累官四川總督加兵部尚書卒謚襄忠祀天津名宦雍正十一年奉

特旨入祀賢良祠

良祠

丁思孔

字泰巖瀋陽人順治壬辰進士康熙八年任直隸守道出納平準吏胥不能為奸時東南

用兵供億浩繁思孔躬自措辦絕不擾民禮待紳士恤行戶惠卒伍尤多善政擢江南按察使

朱弘祚

高唐州舉人康熙二十四年任直隸守道捐俸極荒刑由單平鹽價舊有狐皮梨板累民

力為請免民尤德之祀名宦

邵嗣堯

字子昆猗氏人進士歷任柏鄉清苑二縣俱以廉能著稱康熙三十年陞守道清介持躬

苞苴杜絕僚吏肅然奉法

特擢

江南學使卒於官祀名宦

蔣三捷

遼東人歲貢生順治元年由戶部郎任通州兵備道性威嚴奸胥氣懾每月朔望赴城隍

廟講鄉約六則官師生儒及里老子弟次第立左右跪罪囚於庭前聽講講畢有罪者朴治冤抑者

辨釋人服云
斷稱其廉云

甘文燧

豐城人貢生順治初任順廣兵備道時天下初定民心驚擾撫鞠備至安如承平後殉難

鄆陽郡人遙祭為之失聲

陳維新

奉天人順治四年任昌平兵備道居官有惠政時渤海盜起捕者株連及州維新力為昭

雪民賴保全為立生祠

徐永順

遼東人順治六年為天津道時議勦洗靜海諸邑永順力保天津無賊全活者無算

塗廓

遼東人任河南河北兵巡道駐磁州順治六年寇臨隆平延及武安廓率親軍勦捕馬蹶

陣亡麾下蘇某亦力鬪死事平

贈光祿寺

於州北五里鋪建祠祀之

宋琬

字玉叔萊陽人進士順治十四年任永平道性明決遇事立剖奸宄斂跡境內肅然修學

宮及名宦鄉賢兩祠又修樂器以光祀典輯府志以備文獻

韓

璵

字六一沁水人進士順治十六年任易州兵備道廉靜公敏下車徧詣鄉士大夫家咨詢

民間利病言者或涉偏私能一一識別施行尤有要領在任二年丁內艱去民送至固關

錢世清

字生一錢塘人貢生康熙四年任永平兵備道性寬而敏莅任數年百廢具飭

耿介

登封人進士康熙初由翰林外補大名道澹泊寧靜卓有風軌痛革陋弊苞苴不行吏畏

民懷未久以憂去父老走送數百里

梁忠

遼東人康熙初任大名道察吏撫民寬嚴適中恩被三郡譽達四方

薛柱斗

延長人拔貢生康熙九年任天津道廉以率屬寬以惠民津門為兵民錯處奸宄雜沓之

所綏靖得宜境內帖服

崔誼之

字老山平度州人進士康熙十年任通永道性寬和治政明決鞠讞不阿不徇饋送悉屏

絕之時以

廉靜聞

楊維喬

寧海人康熙十九年任口北道庚申歲歉力請蠲賑賑壤接雲中有豪勢販畧婦女越境者

嚴禁之存卹周備保全甚多

宋 犖

商邱人康熙二十二年任通永道愛民禮士著有政績歷陞江西巡撫調撫江蘇在任十

八年吳民德之晉吏部尚書

王 鴈

福山人康熙二十五年任口北道旗丁利民地可種烟控部差員查丈鴈力為詳請民不

失業迄今頌德官至戶部尚書

曹首望

豐潤人康熙年由禮部郎出督通惠河道築堤挑淺蓄洩得宜漕艘商船均無阻滯在任

三年堤岸無衝決之患民利賴之

黃世發

貴州舉人康熙五十年任肅寧知縣惠愛在民輿情感戴歷陞營田觀察使巡歷勸導善

於其職後以病卒官囊橐蕭然不能歸櫬兼有肅寧任內積欠未完雍正九年六月奉

特旨褒卹

將所欠豁免令督藩欽助俾得扶櫬而歸

畿輔通志卷六十七

欽定四庫全書

畿輔通志卷六十八

名宦

順天府

漢

趙

夔

武帝時文安縣令多異政
值早自焚縣人為之立祠

鄭

昌

字次卿涿郡太守
通法律有治聲

范

遷

漁陽太守有清行以智
畧安邊敵人不敢入界

吳漢

字子顏南陽宛人王莽末往來燕薊間所至交結豪傑更始立使韓鴻徇河北召見漢甚

悅之遂承制拜為安樂令

張

堪

字君游南陽宛人世祖時為漁陽太守賞罰必信吏民服之開稻田八十餘頃勸民耕種

以致殷富百姓為之歌曰桑無附枝麥秀雙歧張君為政樂不可支視事八年邊境安然無警

郭

伋

字細侯扶風人光武時為漁陽太守養兵訓民示以恩信盜賊遠跡在職五歲戶口倍增

楊

震

字伯起弘農華陰人初舉茂才轉涿郡太守性公廉不受私謁子孫但疏食步行或勸之

治產業震曰使後世稱為清白吏子孫不亦可乎

張

顯

元初中守漁陽鮮卑入寇顯率數百人出塞追及之遇伏發顯中流矢與兵馬掾嚴綬主

簿衛福俱沒於陣朝廷嘉顯等節詔
書褒嘆厚加賞賜各除子一人為郎

李

膺

字元禮潁川人性簡亢無所交接惟以同郡
荀淑陳實為師友舉高第再遷漁陽太守人

皆奉令
畏威

王

暢

字叔茂山陽人王龔子少以清實見稱無所
交黨歷官漁陽太守以嚴明稱陳蕃薦暢清

方公正有不
可犯之色

度

尚

字博平山陽人延熹中為文安令遇時疾疫
穀貴人飢尚開倉賑給營救病者百姓蒙濟

刺史朱穆見尚
行事深竒之

滕

撫

字叔輔北海人初為涿縣令有文武材太守
委以郎職兼領六縣蒞事七年道不拾遺

三國

王

觀

字偉臺東郡廩丘人
涿郡太守傳見人物

南北朝

房

謨

字敏放洛陽人魏正光末任昌平太守謨寡嗜慾貞白自守世稱清惠

唐

韋宏機

京兆萬年人顯慶中檀州刺史修理學宮畫孔子七十二子漢晉名儒像自為贊敦勸生

徒郡中
大化

宋

丁罕

淳化中知霸州河溢城圯罕以私錢修築民咸德之

李邈

清江人知霸州時議與金夾攻契丹邈上書極言不可

金

王蔚

香河人皇統間進士任良鄉縣丞詳人物

焦旭

字明銳沃州人歷大興良鄉兩邑令練達時務與王脩劉仲洙輩共稱能吏

劉鐸

元貞二年任三河令隨宜興革官稱其敏民享其惠吏服其明卒於官

伊喇益

字子遷明昌三年授霸州刺史時歲飢益首出俸粟以食飢者於是倅以下及郡富家遞

出粟佐之多所全活郡有隄
頽圯益增修之民為立祠

郭汝梅

字和卿通州人年十八縣民公舉充燕京都稅司三年阿哈瑪特奏稱廉幹擢總管兼尹大

興中統五年卒汝梅泣官有聲績居鄉有功德通人祀之

王脩

涿州人明昌中知大興府事執法不避貴戚後府事闕章宗詔宰臣曰須選極有風力如

王脩者其為主知如此

元

劉德溫

大興人大德中同知大都路總管府事輦轂之下供億浩繁德溫措置有法民用不擾

新濟

至正時為大都路達魯噶齊時權幸肆橫新濟整飭綱紀令行禁止奸宄屏跡

耶律有尚

受業許衡知薊州以清簡得民

華善

任永清縣達魯噶齊志節慷慨才識
練達宣威布惠人不能忘立碑頌之

法都哈拉

知薊州課農桑儲義廩均賦
後簡詞訟吏畏民安擢御史

趙柔

涿州長官號令嚴明為衆所
服時盜起柔單騎說降甚衆

郝仲義

媯川人至正年任昌平尹
有德政見邑人成祖碑記

蘇耀素

至正間任平谷尹操守廉潔民有健訟害良
者書其情狀揭諸粉壁其人改行政聲益著

明

方必壽

洪武間北平知府明敏
果斷有善政郡邑稱之

馬從隆

洪武初霸州知州律已以廉撫
民以仁興學勸農士民頌之

盛本初

洪武時知永清縣撫民以寬經營有度民至今不忘

高進

洪武中大城知縣持身廉潔撫字有方黠吏畏服細民感德

許好問

洪武中知昌平縣廉以律已寬以撫民考最陞山西叅議

王翥

洪武中平谷知縣勸農桑均徭役刑賞得宜奸頑斂跡

賀銀

洪武末宛平知縣材畧兼優永樂中以守城功遷侍郎

韓約

永樂初通州知州為政有方吏不能欺民懷其德

吳萬里

永樂初薊州判有政事能文章卒於官吏民懷之

劉瑾

永樂中文安知縣持已廉公處事明敏有良吏稱

邵元亨

洪熙間知懷柔縣奏言自黃花鎮至紅螺山去天壽山已遠乞弛禁以便樵採輸薪上從

之

李信

臨汾人宣宗時由國學生知遵化視民如家人父子民敬畏之不敢欺當遷父老請留前

後三任歷二十七年里俗呼父曰爹信莅邑久民咸以爹稱之聞者比美於召父累考上上賜爵告歸攀留者遮道

王睿

臨穎人宣德五年任東安縣政治寬平人心悅服任滿民泣留詔以知州仍治縣事卒於

官

張需九

英宗初守霸州見游食者衆置戶籍列男女名口督課種畜暇則取簿驗之缺者罰不二

年民有恒產吏部下其法於諸郡後以忤王振被逮謫戍

汪溥

績溪人景泰中知薊州龍池河壅塞久溥蒞任河忽自通稼有一本數穗者鄰境蝗入薊

即死人比之魯恭

唐忠

天順中知密雲縣為政以便民為先民亦率於教化行俗美時以賢令著聞

陳讓

山陽人進士成化初知寶坻縣事建文廟築城垣搏擊豪右政令嚴肅祠名宦

葉淇

山陽人進士成化年以御史知寶坻縣事廉明愷悌吏民悅服累陞戶部尚書進少保

韓倫

朝邑舉人成化間任武清令鄰縣蝗入境倫禱之匪過不害稼

吳賢

儀封人弘治年任三河令捐俸修學教民栽桑種棉三則定役十限徵糧民以永賴

舒向

弘治間任順天通判剛介負氣節事所當為雖權勢不能屈惠政及民民愛戴之

汪循

正德初順天通判劉瑾擅權循奮然曰是將不利社稷安忍坐視不言三抗疏請裁抑中

官言極

凱切

張英

京衛指揮使武宗南巡挾一刀囊土數升持諫疏當蹕道跪哭諫不允即拔刀自刎或問

英囊土何為曰恐汚帝庭灑土掩血耳

秦僎

正德間涿州知州居官清慎秩滿遷去民借留不允號攀於道馬為不行

周臣

南通州人正德間由主事謫薊州同知時徭役無常重為民困臣接籍清審立為定則百

之姓安

郭名世

安邑舉人正德初任永清令值流賊殘破之後收拾瘡痍修舉廢墜築土城五里至今賴

之

張汝舟

正德中大城知縣值流賊倡亂汝舟率衆捍禦為賊所傷事聞贈光祿寺丞

申良

字廷賢高平舉人正德時任良鄉令性抗直人不敢干以私恤民節用不阿權貴卒贈光

祿
御

孫隆

范縣舉人嘉靖時任武清令嚴明剛介權豪畏避

張守忠

嘉靖中知通州巡撫某敗績於邊將馳入州守忠不納巡撫怒將以軍法治五衛軍弁守

忠馳赴軍門曰城門啟閉知州實司筦鑰若曹何與公當援桴申令再戰以圖功芻茭不給知州責

也若擁勁旅不申威於境外而徒逞志於衛弁竊為明公不取也巡撫慚而去

王乾元

嘉靖中知順義縣持身廉潔莅官嚴正督學使王達謂曰民有子弟子產教之正君之謂

也

呂煥

嘉靖中保定知縣廉幹明敏禁奸保善興學勸農時稱良吏

王業

徐州舉人嘉靖時任永清令邑遭水患緩徵薄斂請裁重役減寄養馬匹多方賑濟存活

無算

朱鳳儀

嘉靖中知密雲縣勸課農桑均平徭役刑賞得宜奸猾斂跡

王文秀

閩中舉人嘉靖間任良鄉令廉幹不畏豪強勸農植桑棗奏免沙壓稅糧民賴其惠

張綸

隆慶中三河知縣清丈田畝查核人丁民皆不敢欺隱行公攤法凡經費俱取辦焉民不

知有供輸驛
遞里甲之擾

孫延長

萬厯中知固安縣值大雨渾河溢士民爭竄匿延長督丁夫負薪伐木日夜修築水不入

城民尸
祝之

馮沂

萬厯中知東安縣廉平清正人不敢干以私

劉希孔

長治舉人萬厯初任永清令建長堤五十餘里立常平倉行條鞭法清隱墾荒鋤克獎善

陞綏德
州知州

袁黃

嘉靖進士萬厯間知寶坻縣嘗捐金以償逋賦講學造士厯陞太常寺卿

楊教

臨晉舉人萬歷年守昌平性嚴毅淡泊自甘大計考天下清廉第一

鄭之僑

萬歷中知文安縣嚴於馭吏篤於愛民每春初修堤先約以高厚之式親持竹簽驗之憫

營浚地窪糧重請折徵民蒙其利

蘇宇庶

萬歷中知保定縣獎誘善良禁戢豪猾力忤稅璫以衛窮民邑人感之

陳廷策

萬歷中知保定縣廉明仁恕治縣五年清白如一日

華袞

湖廣大治舉人萬歷時任昌平守剛正持大體不畏權勢朝覲考天下清廉第一

焦元卿

高平舉人萬歷時任香河令時稅璫王虎僭擬台司元卿不屈虎誣奏元卿坐謫士民攀

臥載途

王四維

山西河曲人拔貢知涿州廉慎剛毅有志操天啟間有旨建魏璫生祠四維不奉詔因被

謫璫敗補
邠州知州

張堪

襄城進士天啟中任永清令時僉派驛馬大為民累堪精心處置省費便公調繁良鄉百

姓如失
慈母

謝陞

德州人由進士除三河令有幹局視國如家愛民如子尋調遵化官至大學士

朱巽

吳縣監生涿州守秩滿士民保留陞順天治中仍掌州事

張滿

羅山舉人任遵化令以經術莅治里胥有過薄答示辱輒不勝愧卒於官老穉思之

郭議

德平舉人知遵化果斷明敏胥吏無所容詐勸課農桑禾生三穗民歌詠之

劉耀武

遼陽舉人任香河令性明決重學校為政務順民情民愛慕之

趙千之

鄒縣監生為香河令作興學校愛養百姓當凶歲賑濟有方全活甚衆

賈璿

陝西人歲貢生知薊州訟清政簡日延父老問民疾苦有不便者為當道力陳其狀釐剔

務盡陞大
同知府

梅國楨

知固安縣為政闊畧簡易務得民心中官操豚蹄為餉請徵債於民國楨曰今日為君了

此急牒兵至趣令鬻妻償貴人債而偽遣人持金買民妻追與偕入民夫婦不知也哀慟死訣中官

亦感動毀
券而去

李陰

字干美內鄉人知宛平彊項執法中官母殺人捕論如法司禮馮保以屬江陵江陵曰此

令非吾所能禁也召之竟不往李北海雲麾將軍
碑石燕沒良鄉驛舍蔭輦至邑署名其齋曰古墨

風流好客
士論多之

馮

琨

崑山舉人知薊州愛民課士緯有古風嘗辦
草場得罪權要逮錦衣獄者二守正不撓事

明卒

趙

貴

知遵化政治恬熙春時勸農單
騎詣郊民習而相親不為輟耒

李

琮

武城舉人知房山廉介有為政教無舉擢判
大同百姓保留仍攝縣事後陞保定府同知

去之日婦女老稚莫
不悲號送者如市

石鳳臺

陽城人天啓乙丑進士崇禎己巳良鄉殘破
鳳臺自南宮調任撫殘黎立官署上疏請蠲

二年賦稅十年
依馬詔從之

王象雲

新城進士崇禎初任永清令敵入攻人無鬪
志象雲命男婦乘城設檣炮木石敵人引去

擢御
史

李鑑

崇禎中知永清縣練鄉壯繕甕城
積軍需土賊戒不敢犯民賴以安

郭凝鼎

汶上進士崇禎初知遵化殘破之後村落空
虛士皆短褐不完凝鼎見之歎歔泣下力請

賑濟邑民以活忤權
貴落職民為罷市

常維翰

崇禎中知保定縣流賊入畿輔州縣官宵遁
維翰曰守土之吏義與城存亡寧死敵勿死

法乃率衆固守事
定陞東平知州

史應聘

崇禎中知寶坻縣時流寇充斥
鼓厲兵民上下一心邑境安堵

高承埏

崇禎中知寶坻縣廉惠敏
幹深得民心有保障功

沈域

崇禎中知灤縣料理城守舉動安詳
巡方董怪而問之曰斗大孤城何恃而不恐域從容

拱手曰以身殉之
城卒無恙

王

鑰

崇禎中知文安縣勤敏果毅
十一年聞警率紳士死守七晝夜援絕城陷與主簿安衡典

史湯國紀訓導郭養性皆
死之鑰贈太僕寺少卿

黨還醇

三原人令良鄉吏事精敏尤留心於干振厲
兵堅守力竭援絕死兵退士民覓得其屍氣

勃勃如生典史史之諫教諭安之遠
訓導李廷表驛丞楊其禮偕死節

高維岱

昌邑貢生崇禎時任永清令僅旬餘賊至城陷岱死之合家遇難

趙一桂

崇禎末以省祭官署昌平州吏目甲申三月莊烈帝后既殉社稷梓宮暴露偽符下州令

葬時州無正官庫藏如洗一桂與監生白紳庠生孫繁社守備王政行及義士劉汝朴王汝朴徐魁李某鄧科趙永健劉應元楊道等各傾資產得錢三百五十千啟田妃壙官奉安帝后以妃擲為帝槨出募西山口居民擔筐舁土築塚修垣復率鄉耆奠祭悲號聲震陵谷

本朝

孫光祚

范縣人舉人順治元年知保定縣持躬廉潔視民如子值水災光祚力請開長平倉賑濟

民賴以甦

秦世正

浦陽人貢士順治三年知文安縣清審絕戶額數有虧詳請豁除民感其德

郭皇畿

山東人進士順治三年知遵化縣以撥補地畝民多驚怖皇畿遍示曉諭許以熟者認種

荒者徐墾人心大安

劉漢傑

遼陽人貢生順治五年知遵化縣緣撥補事民之黠者誣傑併連遵民傑毅然曰撥補由

官與民何與黠者卒致黠者於法民至今頌德

范蓋

字葵白洛陽人順治年知遵化縣性慈惠操行廉潔為政不務張弛而條理自若以撥補

旨還職

又被劾士民請留奉又以鄰邑逃人波累解任士民惜之

陸光旭

平湖人進士順治九年知保定縣癸巳大水決隄繼以大疫請蠲外復捐俸作糜以賑畧

中食或不給糧御史復請免霸文保三州縣荒地
錢糧轉冀南道聞保定復罹決隄之厄遣使齎金
分給窮民保人立祠祀
之并勒石以紀其德焉

韓文

富平人舉人順治十年知文安縣歲大稔
捐俸備糜粥哺飢者民賴以活至今感頌

成王臣

河內人舉人康熙二年知三河縣臨事果決
莅任三年不差一役訟令自拘隨至即訊鞠

之無不
悅服

崔啟元

奉天人舉人康熙十一年知文安縣風裁嚴
肅裁決如流鹽梟犯境率兵親勒長子為賊

所害士
民悼之

靳讓

尉氏人康熙丙辰進士由御史出知通州釐
剔奸弊加意學校士民戴之歷陞浙江學使

祖延泰

奉天人知霸州舊例凡壇廟大役兵弁支米及解部貼費俱派民間雜費多於正額延泰

盡為革除

大兵北征州應出騾車等軍需延泰捐已資措辦不以

煩民民至今

懷之祀名宦

劉德弘

開原人知涿州性仁慈而才敏贍案無留牘獄鮮滯囚康熙三十一年祀名宦

潘永圖

字慎菴金壇人進士知薊州執法嚴明有犯者賄當道干請焚其函牒置於法

何訥

字銘三崑山人進士知保定縣戊辰縣苦水潦訥晝夜胼胝為築堤捍災嘗中夜看視堤

工馬驚墮水溺幾死父老為之感泣邑

賦多逋欠訥以羨耗代民正供民德之

陶弘才

會稽人任東安縣典史壯勇嫻武藝順治五年妖賊劉東坡寇東安時邑令詣會城弘才

率軍三百餘出城奮擊斬獲甚衆再戰中
妖術為賊所執猶奪刀殺賊數人自刎死

蘇就大

交河人歷任大城饒陽元氏訓導講學窮理
教士務敦實行所至文風蔚興著有麟經傳

意行

世

永平府

漢

李廣

隴西成紀人秦將李信之後家世受射拜右
北平太守敵人畏之號曰飛將軍廣出獵見

草中石以為虎而射之中石沒鏃視之石也廣廉
得賞賜輒分其麾下為二千石四十餘年家無餘

財終不言

家產事

路博德

平州人武帝時為右北平太守從驃騎將軍會興城至橐余山斬首二千八百級封符離

侯

趙

苞

字威豪武城人為遼西太守名振邊俗遣使迎母及妻子道經柳城為鮮卑所劫實以擊

郡苞悲號謂母曰為子無狀不圖為母禍母遙謂曰人各有命無虧忠義遂遇害事平封苞為侯苞曰食祿而逃難非忠也殺母以全義非孝也何面目立於天地遂嘔血而死

南北朝

于天恩

代郡人熙平間任遼西太守為政和平百姓懷之

唐

田仁會

長安人永徽中為平州刺史歲旱自暴以祈雨雨大至穀遂登人歌曰父母育我兮田使

君挺精誠兮上天聞中田致雨兮山出雲會康實兮禮義申君常在兮不患貧

元

劉德溫

大德中永平路總管時兵革之餘野無居民德溫為政葺年戶口倍增

左濶

良鄉人秦定五年授昌黎知縣興學校薄徭賦老稚感恩之

孫明

大寧路人至正初知灤州事人和政清捐俸倡修學宮士論稱之

周宏

字希道遷安人至正間知昌黎程思中作亂宏率民拒守城陷被執不屈死

明

金彥祥

浙江人洪武三年元將姜文靖內侵圍永平彥祥以還安簿轉餉不乏及兵迫縣悉力拒

守事平擢知本

縣陞兵部主事

婁大方

浙江奉化人洪武初授撫寧知縣時值草昧城邑荒破寇至大方率吏民避兵於洋河西

兔耳山南遂建縣治經營區畫秩然有法寇不為患士民德之

馬負圖

山西臨汾人永樂中知永平府牧御有方修舉廢墜百姓戴之如父母

陶安

常熟舉人永樂中知溧州吏事精敏每農時出郊勸農在任三年境內殷富

趙寬

垣曲舉人成化間知樂亭縣有鷹房奄人騷擾境內寬詰責笞之被逮下獄法司察其寬

職還

呂

鎰

郟城人弘治中知灤州舊稅糧輸邊細民轉運甚困鎰請於上官得改運邊民至今稱之

張

表

弘治中豐潤知縣長於聽訟決斷如流奸惡者諭令自新不悛則懲以法由是人皆悔過

而訟
自簡

張

愷

字元之無錫人由進士任山海兵部主事操持嚴介有冰蘖聲闕舊法止驗籍與年愷始

稽貌以杜詐
冒至今因之

何

詔

山陰人正德二年知永平府中官王宏鎮邊踞視長吏詔獨不往郡有叔殺人而委罪於

姪獄成且二年詔一訊立辨釐宿弊
均糧後即奸胥老吏不能索一錢

羅

玉

正德中遷安知縣歲旱徒步禱烈日中乃雨民飢請發通州倉賑之全活甚衆調知武進

攀援
載道

張

玘

石州進士嘉靖二十五年授永平知府甫下車即釐剔宿弊事有不便於民者悉力除之

立孤竹書院以風厲士類拓
夸齊故城畀守祠者世守之

張守

涇陽舉人任永平府同知署灤篆舊例草束赴京民甚病之守疏請改附近倉驛歲省銀

十之九中官鎮守惡其不利已妄奏
械繫科道交章薦救得免灤人祀之

葉宗蔭

浙江遂昌舉人嘉靖中知撫寧縣興利除病一境肅然致仕去士民泣送百餘里

韓應春

往平舉人嘉靖中授灤州知州嘗開釋誣坐軍四十八人民懷慕之為肖像祀焉

徐準

山東新城人進士嘉靖中知永平府時倭警方熾海防單弱準請兵二千駐防恃以無恐

征倭兵十萬由永度遼供需飛輓增
派丁銀倭平悉請復如舊六屬歡呼

邵可立

商州人進士任山海兵部主事建文昌書院
購古今遺書以教士嘗三劾貂璫四減關稅

修鎮東樓工師苦無大木忽海上浮至尤
陽不雨三禱三應士民咸嘆為神助云

賀榮

神木人任玉田令性甘淡泊甫蒞任悉更弊
法里甲頓蘇陞知涿州吏民時往省問如家

人

王袞

陽穀舉人嘉靖時知盧龍邑苦倭馬袞市之
都門民免賠累值倭警當事欲籍民為兵遠

近駭竄袞力陳不便更為
名募應者立集民藉安堵

徐楨

長洲人進士嘉靖中任刑部郎忤分宜相左
遷知灤州值歲飢民多流移楨善於撫綏民

為復業教之孝弟力田
期年倉廩實學校興

沈之喆

烏程人任永平推官值大水之喆
縛筏拯溺散粟賑飢生全甚衆

陳維城

山東邱縣人進士萬歷年知永平府操守廉
潔衣履若寒士衛餘僉大戶徵收立致罄產

維城決議以收納事盡責各
衛首領著為令甲舍餘得甦

任鎧

平定州人萬歷六年知永平府時料丈田地
小民無知十止報九當罪者衆鎧乃新製步

弓比舊暗增五寸俾分數相
合衆得免辜時論稱為長者

王象恒

山東新城人由進士萬歷中知盧龍縣值灤
漆水漲歲飢流民載道象恒多方賑濟全活

甚衆

吳望岱

會寧人萬厯中授昌黎知縣吏治精明斷獄明敏父應選亦曾任昌黎邑人感其世德焉

張元慶

山陰人萬厯中知灤州多異政夜宿古冶寺有女鬼韓氏訴奸僧妙存淫殺狀即捕訊伏

罪一時驚以為神

張至發

淄川人進士令玉田有決斷縣豪猾藉璫虐民置之法民以甦厯陞雲南道崇禎朝拜大

學士

陳名華

字誠甫晉江人進士任戶部郎中理餉永平申明不用土商之令客兵屯海上擾民請撤

之士民立石以頌

方岳貢

字四長穀城人進士以戶部郎督儲永平性清廉出納不取餘羨有逋戶解比者不事鞭

朴勸令速輸人
以長者爭納之

陳祖苞

海鹽人進士任山海兵部主事一日坐堂上忽有羸馬入向堂長鳴命人尾之至一家馬

跑地得屍訊得謀財致命狀又有四人失路引回關中官以奸細論苞不可竟得放歸

陳所立

字如有福建長樂舉人知永平府雅尚經術立書院政餘集諸生較論文義終日不倦泚

漆水派啗城築磚隄以障之復栽蓮芰以資民利

彭份

字洗存南昌舉人知永平府前官遺逋累份鎬級者六終不以累各屬歲侵蝗不入境流

民萬計趨永就食份設厰煮粥全活甚衆營兵夜諜份戒守柵扼巷始開門擊之時服其精審云

劉濬源

曹州人進士知盧龍服不衣帛食惟蔬菜或出巡行備餅自給於當道毫無覬遺聽訟執

法雖勢力者不能干以私人以趙清獻頌之

馬孔健

陳留人進士知廬龍督師孫傳庭欲入城民駭甚健設館城外民賴以安臺司檄縣運糧

十萬石至遼健條議令兵卒協力津遞而民不擾有巨室兄弟爭產成訟健閉閭引咎數日不視事

兩家慚謝和好如初

李鳳翥

字瑞徵樂安舉人崇禎元年知樂亭縣多惠政忤上官罷歸民立石頌之

左應選

崇禎中知昌黎縣明季寇亂攻城諭民竭力死守男女皆兵城卒保全

張鳳奇

山西舉人崇禎中知永平府軍興旁午鳳奇修廢壘備芻糧為固圉計庚午永城不守咽

藥而死妻亦闔門自經事聞贈光祿卿

楊

燠

貴州舉人崇禎中知灤州大兵克永平州人李際春以城降士民竄匿燠拔刀自刎事

問予贈廕

祀專祠

余

爵

字天有禹州人進士崇禎間知撫寧縣尋陞職方郎中監軍殉難贈太僕寺卿謚忠壯

本朝

陳

丹

字自修山陽舉人由楚臬左遷知永平府甫下車即盡革地方供應還各屬治事精勤苞

苴不納署內自奉不異寒素卒於官士民哀之

李中梧

字燦字遼陽人初任玉田令多惠政擢知永平府有以鋤刃斃人久未成獄中梧命以穀

草灸鋤血迹儼然讞乃定其明決多類此

華黃

字中涓無錫人進士知永平府恤屬僚愛百姓決獄片言人心悅服永郡科甲素少黃修

學課士文

風浸盛

梁泰來

字吉人壽州舉人任永平同知署府篆廉靜自持推誠待物民不忍欺時稱長者上官多

器重之

羅京

字眉師浙江人由中書任永平同知歷事詳慎嚴飭胥吏有窮民鬻女償逋京為贖還

尤

侗字展成長洲人由貢生任永平推官學識優長治政明決優禮師儒因材鼓舞士習丕變

後登博學宏詞科
官翰林院檢討

白芬

字倚若河南舉人任戶部郎中樞山海關剛果明決嘗自云興一利不若除一害有弄法

者痛懲之出入
權衡軍民愜服

劉觀瀾

洛陽人任山海管關通判值悍卒狂逞頑民
影附撫御勞心卒於官闕人為斂貲歸其喪

祀名
宦

祁富哈

滿洲人山海衛城守章京清廉有守常俸外
絕無沾染且能約束卒伍撫恤士民闕門享

無事之福者數載
以疾卒官祀名宦

吳盡忠

任縣人任山海關都司順治初土寇猖獗擊
敗之六年賊騎劫掠盡忠率眾追至邢家灣

馬蹶為賊所
執不屈被害

李士模

字可菴高密人進士順治十四年令盧龍才
識優長遇事立剖邑舊無志士模始為纂輯

陸 楸

字林士平湖人副榜康熙二十五年知盧龍縣廉明剛正不畏權勢愛百姓如家人以直

忤上官印去即步行出署及束裝惟來時敝篋傘履而已

王永命

臨汾人知遷安縣持躬清介課士廉明設緝逃捕盜法民甚賴之修冷口邊牆建孔道橋

梁不悞公不擾民陞行人民為立碑誌德祀名宦

羅景泐

泰和人知豐潤縣竈戶舊有邊布之徵地既被圯折徵如故履任後具詳上官攤入地糧

項下窮民得免追呼縣多公費如運糧車輛喂馬草束舊皆按里分派景泐悉捐俸應付不以累民諳練河務開挖有方優禮生儒卷不去手

王夢麟

字玉山貴州平越舉人知豐潤縣性耿介舉動端嚴革除重耗雜派嚴治豪強積盜聽斷

廉明門無私謁吏民愛之如慈父母捕蝗遍歷郊野境不為災歲亢旱身率士庶蓬跣叩禱赤日中甘兩大霈以憂歸三子一僕策蹇就道行李蕭然長子士俊在籍鬻產隻身來迎遇於磁州啟橐僅存白鏹不滿四金聞者咸嘆息為不可多得雍正元年祀名宦

陳恭錫

貴州舉人知豐潤縣歲飢賑貸有方查革里香浮冒之弊邑河淤塞捐資雇募開濬自張

各莊至豐臺鎮三十里咸得疏通民獲其利至今頌之

保定府

漢

劉梁

一名岑字曼山東平人桓帝時舉孝廉除北新城長大作講舍聚生徒數百人朝夕自往

勸誠儒
化大行

南北朝

王憲

字顯則北海人魏太武中為上谷太守清身率下風化大行

袁聿脩

字叔德陽夏人齊天保初除博陵太守大有聲績

唐

張允濟

青州北海人任高陽郡丞吏民畏悅賊帥王須拔攻郡糧絀食槐葉無叛者

宋

李繼宣

開封人淳化三年知保州築城浚濠葺營舍千五百區造船百艘以運糧人咸便之

曹翰

大名人太平興國五年詔督役開南河自雄達莫以通漕運翰築大堤以捍之傳詳人物

楊信

瀛州人初名義知保州有戰功與楊延昭久居北邊俱以善戰聞時謂之二楊

張宏

字巨御益都人太平興國中知遂州以勤幹聞

張暉

大城人乾德初為邠州刺史三年吏民詣闕舉留督築武張等城踰月而就

安守忠

字信臣晉陽人淳化二年知雄州一日方宴僚佐有軍校謀變擐甲及闔閭者倉卒入白

守忠言笑自若徐顧坐客曰此輩酒狂爾擒之可也人服其量

侯仁矩

平遙人宋初歷祁雄二州刺史治軍有方畧歷數郡咸有善政

高繼勳

知雄州契丹獵燕薊候卒報有兵犯境邊州皆警繼勳料其不然已而果無犯

劉無濟

知雄州先是邊民避罪逃者契丹輒納之守將畏事不敢詰無濟悉移檄責還

石元孫

字善良知保州開屯田鑿塘水詔賜白金五百兩褒諭之

漁仲脩

元豐六年以宣德郎來尹慶都發奸摘伏勸課農桑民多德之

李緯

知雄州積公錢貯米三千斛為常平奏下其法以示他州

劉承宗

祁州人祥符初知保州改知雄州在郡有治迹詔書嘉獎

張昭遠

知雄州會大雨陂塘溢昭遠勒兵築長堤以捍其衝

王杲

知保定寬和多善政時宦者楊懷敏廣屯田奪民地杲上書爭之

楊應詢

知保定軍善於料敵徽宗欲增歸信容城兩縣弓手或恐生事應詢曰吾欲備他盜彼安

能禁我
卒增之

馬譽

大同人政和間尹唐縣勸課
農桑休養士卒人多感慕

郭季良

白登人政和中任唐縣典史贊助區畫一本
至公發奸摘伏出人意表去任時人遮道泣

留

閻承翰

正定人為高陽關三路排陳都鈐轄時中山
屯兵甚眾艱於飛輓承翰鑿渠引唐河合沙

河經邊吳泊入界河以濟
漕運人以為便優詔褒之

張利一

字和叔知保州雄州遼人刺兩屬民為兵民
不堪其辱利一綏徠之大姓舉族南徙者至

二萬利一發廩賑恤且移
詰涿州自是不敢復刺

張

載

為祁州司法叅軍以敦本善俗為先月吉具酒食召高年親為勸酬因問民疾苦并告以

訓戒子

弟之法

劉

渙

字仲章保州人仁宗時知本州事保自成卒叛後兵益驕渙初至軍士謀舉城叛渙單騎

徐叩營械首惡者歸斬之一軍帖然

遼

蕭

議

字立義任新城兵馬都監兼知烟火事民風丕變進士李唐作德政文以美之

馬人望

字儼叔醫巫閭人為新城令有善政

金

劉公弁

字正夫泰和六年為唐令政暇率民疏唐水沃田幾千頃興學校嚴吏胥王庸作文以記

之

雷思

渾源人知容城廉平寬厚民懷其惠

王子昌

守保定元太祖定河朔子昌堅守不下戰死

馬諷

字良弼滹陰人為歸信令境內有河曰八尺口每秋潦漲溢害民田諷視地高下疏決之

其惠遂息
傳詳人物

劉仲洙

字師魯宛平人大定時為祁州刺史以六善為教民化之傳詳人物

圖克坦航

一名扎克繳至寧元年呼沙呼降為安州刺史會北兵至盡出家財以犒軍士堅守不支縊

妻孥自殺百姓
從死者甚衆

元

哈斯呼

其先唐古氏以小字哈斯行至元四年任保定路總管勸農興學扶弱抑強蝗生傷稼密禱

於神翼日蝗
滅人以為神

裕魯布哈

字彥明保定路達魯噶齊後復以尚書知郡事會賊北渡河廷議發省衛軍出戍裕

魯布哈疏請留其兵自統黑軍數千人團結西山
八十二寨軍勢大張賊不敢犯及召還民繪像祀
之

孫拱

至元中為保定路治中歲飢議開倉賑民或
曰宜請於朝拱曰若待請則民餒死多矣苟

見罪吾自任
遂發粟賑之

吳

鼎

燕人至大初為保定路總管時皇太后將開
五迴嶺以幸五臺鼎言荒山陡絕人迹罕到

非乘輿所宜往還其
役遂寢時論躉之

耶律伯堅

字壽之桓州人尹清苑縣西有塘水溉民
田勢家據為磴伯堅毀磴溉田聞於省部

著為制縣當南北衝築公館以代供帳邑民
不擾賦役重者詣府力爭民戴之如父母焉

宋著

字彥明固安人知定興規畫常平有
法軍民畏敬改知涑水威德並行

王君玉

字國寶武清人刺遂州政尚寬簡嘗一僕一
馬出郊督民值桑乾河決修築掘民田土君

玉不忍割俸買地取土民無害焉賑貸使至境以
民無飢色不給玉曰東作方興苟或不給立見溝

壑慷慨流涕使者感
動賑之民頌德焉

李仁

字仲安臨泝人至元中知遂州庭無滯訟獄
無冤囚賑窮民修學宮葺郡署厯有善政可

紀

李天祐

尹新城時河朔新經兵難艾荆棘立
官舍建儒學以誨生徒風化丕變

劉漢臣

世祖時為滿城令創
修學校士風始振

袁彥通

至元間為東鹿令明而能決
豪猾斂迹當時稱能吏焉

成克敬

字子欽濟陽人守祁州以禮樂導民
風丕變時學校未備克敬首以為務

崔敬

字行簡鎮陽人順帝時知
滿城民物安阜境內大治

張從信

字子孚鄆陵人至正中守安肅扶善抑強屢決疑獄

王時可

至正間知歸信縣兼管勸農事作均樂亭記

王克勤

碣石人宰蠡縣禱雨有應歲賴以豐勸農植桑養蠶以為利

莊敬

字思恭淮安人至正時守唐縣披剪荆棘立市廛瘞枯骨新學宮繕城郭慨然以保民為

務

明

王讓

益都人洪武中為保定知府忠亮清介時論重之

王思祖

仁和人洪武七年知安州兵火後州治學校及壇廟皆毀思祖創復之植柏數千章民覩

其樹而思之終於官子
孫不能歸遂為州人

范志遠

安邑人洪武時知安肅縣有善政坐事被逮
父老百十人詣闕請還任帝嘉之賜志遠襲

衣寶鈔

遣還

高楫

保德州人永樂中知東鹿政尚寬簡在任十
餘年化民以德陞德州知州民不忍其去

王禮

諸城人永樂中知滿城持躬
廉約食惟蔬糲賢聲大著

周監

汾西人宣德間知保定府寬
厚廉明陞叅政仍知府事

王弼

招遠人宣德間知高陽勸課農桑教養士
庶秩滿百姓奏留安州民保陞本州同知

陳哲

宣德初知博野有異政秩
滿當代百姓奔走泣留

黃子嘉

蒲田人以明經薦正統六年授東鹿知縣慷慨有氣節已巳之變北兵突至城下衆欲棄

城遁子嘉獨誓

死守城賴以全

盛

顯

無錫人以監察御史建言忤旨出知東鹿廉慎有才庭無滯獄以憂去服除百姓請還任

張

璉

安仁人容城縣丞服官清謹正統間兵變官馬被掠幾盡璉詣關申訴得免賠補民感之

林

巍

正統間完縣主簿九載秩滿當遷縣民陳其善撫字乞留任詔增一級還之

高

儼

正統時為清苑管馬主簿得民心九載滿將去適縣闕丞父老乞於朝以儼為之果以善

政聞

楊集

常熟人景泰甲戌進士時方議易儲集上書責于謙大學士王文見書嘉其膽識進一級

除知安州勤政有聲築堤植柳以禦水災民尤德之明進士除知州自集始

殷

禮

陽曲人天順間知新城躬詣鄉村勸民稼穡養孤寡親士類人皆德之

章

律

常熟人成化初知保定府脩學宮廓倉廩廣儲蓄毀僧道菴院為公署民甚便之

趙

英

蘭州人成化間知保定府以憂去服除適知府缺吏民奏請再任允之歲祲太僕寺徵孳

養馬方急英以為言并隣郡得減免民深德之

王

欽

上元人成化中知安肅清嚴有才幹城池公廨多所修理植柳四路後值大飢民折以易

米所活甚衆

陳

璫

松江人成化中知清苑均力後課農桑養老尊賢興學造士

王溥

字文博龍州宣撫司人成化間知完縣有惠政民立碑記之

童潮

字信之慈谿人成化中知祁州政先仁恕愛民如子去之日民遮道泣留

董朴

麻城人弘治間知保定府建社學教子弟斷獄尤為嚴明

董傑

涇縣人弘治間知保定府積粟十餘萬石後值凶荒郡人賴之

譚綬

石泉人弘治九年知安州為政平易近人丁內艱去無資斧士民助之

周倫

崑山人弘治間令新安興水利建文廟創書院於三臺享元高士劉因

陳言

長樂人弘治時知雄縣制行謹厚工書能文剔蠹弊毀淫祠時久旱蓬首跣足禱而即應

秦偉

三元人正德中知保定府年稔作粥濟飢施藥療病

任守德

字衛道山西人正德間知清苑有才力武宗經保定中官橫索應之裕如而民不擾

張鉞

字汝度平度州人正德間知清苑操持清介七年不易

胡守約

合州人正德中知蠡縣流賊破城被執不屈賊釋之

祁鯨

汲縣人正德中知容城度地均糧頓除夙弊

李昇

均州人正德中知新安武宗南巡江彬械之至臨清以索賄昇曰守死善道儒者常事剝

民以求生不為也彬怒淹繫二年世宗立始釋之

張元電

成都人正德時任保定知府武宗巡行一切供億秋毫不取於民權宦誣奏被械繫旋亦

釋之

易

鴻

字冲霄固始人嘉靖初知雄縣興學校恤貧士事集而不擾以勞瘁卒官囊篋蕭然無以

為殮

李秉彝

字天常石州人嘉靖初知蠡縣嚴於懲惡頑民屏迹均田平賦流歸者千餘戶

周道

字大經河內人嘉靖時知蠡縣識大體守清約境無盜賊獄無罰鍰

周冕

滁州人嘉靖時知新安築堤禦水民甚感之

張寅

字仲明太倉人由御史忤權貴嘉靖中謫守安州勤慎廉明撫民愛士築濡陽隄開牙港

河定名賢祀修州志善政綦多

高

紳

鍾祥人嘉靖十三年任東鹿知縣愛士養民著有善政

崔廷槐

平度州人嘉靖間知東鹿均田捕蝗治水有法

趙希夔

潞安府人嘉靖間知安州築隄障水設榻河邊不言勞苦

吳嶽

汝上人嘉靖二十五年知保定府躬先儉約敦崇教化革清苑里甲灘錢民皆稱便

辛吉

金鄉人嘉靖時令滿城恤災患撫流移減上官供應除里賦額外之征士民頌德

胡政

松滋人嘉靖間知雄縣增脩城堞軫恤窮黎嘗擒獲巨盜民賴以安

蕭文清

廬陵人嘉靖時以舉人知祁州築堤捍水伐柳植之號曰木城值旱步禱每雲起風輒散

之文清夢鬼持幡怡風明日索淫祠得土偶如夢中狀手碎之風息雨乃降

李尚智

屯留人嘉靖間知清苑邑有見年後二十四里里共一日有一日費至數百緡者尚智力

為節省日不過
一緡民得蘇息

張梅

弘農舉人嘉靖時令新安大水潰城堵塞有方城賴以全歲飢為請蠲賑全活甚衆

彭好古

河南夏邑舉人嘉靖時令新城均里役裁公費飭紀綱振黌校子健吾端吾並進士

胡諧

安邑人嘉靖時知慶都手書薛文清從政格言以自淑善政甚多其履畝均稅尤為邑人

感頌

谷中虛

海豐人嘉靖時宰高陽年甫弱冠發里社積書之奸丈龍化里沮洳地六十餘頃以輕其

稅訟簡刑清
案無留牘

嚴清

雲南人嘉靖中守保定練達政務創議邊法一條後人率行不易

謝良琦

武進人隆慶中由進士知蠡縣敷政和平馭下嚴肅奸胥猾吏憚如神明

賈仁元

萬泉人萬厯初守保定出入戴星廉敏有古風遷去惟圖書數卷吏民攀卧至嗚咽不

能言

顧顯仁

武進人萬厯間知保定府嚴以取吏寬以惠民讞獄精明猾吏斂迹

李楠

崞縣人萬厯間守保定沈毅精詳著有善政

查志隆

海鹽人萬厯中守保定建社學勸課其文辭藻耀尤士林所重

孫希夔

大庾人萬厯間知唐縣脩學禮士條議均賦上官凡有加派不復及唐

汪治

光州人萬厯中守保定孝友夙著以德化民歲飢賑活數百萬人抑權採中官建文獻大

觀以
勞卒

冒守愚

如皋人萬厯初知高陽果毅
敏幹築萬柳堤百年永賴

楊一桂

安邑人萬厯時知唐縣導唐河以溉田開渠
三十里建閘以時蓄洩其筦鑰則設長司之

唐人利賴為
立祠渠上

王象乾

新城人萬厯初守保定約躬
儉朴作養人才多所成就

顧四明

利津人萬厯中知清苑貞介寡合加意惠民
絕勾攝之使減厨傳之供坐是不得志於上

官遂
告歸

張弘襟

鄆縣人萬厯時令清苑郵清盜息吏畏民
懷陞儀部主事去時民礮石肖像志思焉

周之蕃

字熙春臨清人萬曆中令高陽堤決民幾為魚次年復大浸之蕃率吏民守四十晝夜每

雷雨輒跪禱泥塗中襟面淋漓左右皆為之感泣

錢春

武進人進士萬曆中知高陽恩威並著每奉上檄為民事者則奉行或不急勞民則堅執

不予邑東有龍化里水地為累申請減賦別其名曰水免邑人至今懷其德焉

楊世增

蒲州人萬曆時進士為安肅令莅政五載課士勸農置學田建義倉民鑄石頌德

張光前

彰德舉人萬曆時為慶都令民自陳利害設法興除建學延師開渠洩水置來安鎮積慶

坊生聚至今為盛民俎豆之

胡嘉桂

西華人萬曆時進士知定興崇廉讓重氣節刻齊家律以敦風俗崇儒禮士誠衙胥不許

與士並行於道及卒士民巷
哭建祠於郭迄今祀事不衰

畢自肅

淄川人萬厯時知定興時邊圉多警供億煩
猥自肅勸民樂輸又折徵鹵田民永戴之

許宗魯

河內舉人萬厯時知慶都歲大水餓殍橫
路繪圖請賑得粟八千餘石全活甚衆

劉天與

垣曲人萬厯時知慶都講六約環聽者數百
賞夜紡之婦朴衣絲之吏辨盜瓜之誣及今

人猶巷
說之

張興行

絳州舉人萬厯時令容城釐定三壤豪右
不得兼併正軍籍力役均平民建祠祀之

徐廷松

掖縣舉人知容城敏毅有吏才歲飢出積粟
減值糶多所全活買牛百助不能耕者境無

蕪田民
懷思之

何出光

字中寰扶溝人萬厯時進士官御史謫完縣令甫下車陳邑三大害立除之崇禮讓獎士

類卓有實政及

去民尸祝之

景

昉

字啟寰安邑人萬厯中進士令完縣明習吏治左右無所欺抗中官百姓釋金壕之累以

治行第一

擢繕部郎

張保民

字惟赤定襄人萬厯間以舉人令完縣賦不責羨訟不罰鍰邑有俵馬之累請徑解太僕

寺省驗視之

擾邑為建祠

王國賓

往平人萬厯時進士知蠡縣捐資濬河水不害田蝗蝻生為文祭告蝗即負蝻而去至今

傳為

異政

黃道亨

咸寧人萬曆時舉人知祁州飭保甲均徭役覈詭派革耗羨未期月而政成歲荒捐俸煮

粥全活數千人招流民

開渠灌田至今利賴

傅延者

歷城人以貢知祁州有豪右犯法上官屬出之延者指其冠曰此冠可奪此法不可奪上

官愧謝六

載卒於官

王則古

字具茨禹州人萬曆年知雄縣興利除弊愛士濟民歲六月不雨民飢盜起賑濟緝捕條

理井

然

劉策

武定人萬曆間令新城除倉庫之害脩白溝河橋建城東西兩門悉捐已俸不費民財

王永吉

無錫人天啓初以進士知定興革火耗絕贖緩時魏璫坐揚左諸君贓永吉傾囊佐之且

曰此物不於此
處用更無用處

王文清

山東人進士令容城律身甚嚴待士以禮署
雄縣除驛累歲省民金銀鉅萬兩邑皆尸祝

之

張銓

字見平沁水人為保定推官郡有兩是亭祀
楊總宗許達履任日夢入亭中神揖之曰虛

席以待子矣後盡
節遠東果符所夢

張若麒

膠州人崇禎辛未進士知清苑賦令民自上
訟令民自勾贖緩歲報十金郡守少之若麒

曰寧使無訟甘受下考守默然部議預徵力格不
行曰邑貧而衝非他可例竟得請邑附郭案贖日
盈尺片晷輒了
人服其明敏

崔泌之

鹿邑人崇禎時進士由雄縣調繁清苑氣岸稜稜豪宕不羈輔臣周延儒憾御史黃宗昌

異已諷泌之撫其令縣時不法狀泌之毅然曰殺人以媚人吾不為也以是獲譴里居陳州流賊破

城不

屈死

薛綦隆

翼城人崇禎時知定興厥衛勢張有緹騎以檄赫邑人金吾劄百里外不得攝人所懷檄

贖也綦隆以赫詐牒

金吾反得罪落職

原秉謙

山西舉人知慶都浚溝渠興學校取後晉人如冰上立時為之頌曰一念慈祥千節暖滿

堂冰雪

四時寒

張安甫

字汝勉崑山人知祁州平徭簡訟視民所患苦而休息之期年大治每晨起坐廳事吏抱

積署訖輒放衙灌花或捲簾
晝卧州人若不知有守者

申九峰

思縣舉人崇禎時令滿城嚴明廉正學宮鄉
賢名宦等祠舊俱傾圮九峰捐俸新之不以

累民一時
稱循吏云

南洙源

字生魯濮州人崇禎時進士由戶部郎出守
保定歲大祲人相食洙源不請上官發倉賑

掾曰家有薄產可鬻以補倘待請民命
休矣至今郡人於其誕日餼錢祝之

廖國遴

字孟符長沙人崇禎時進士為保定推官嘗
手書格言激勉屬吏擊除豪蠹風節矯然秩

滿授兵科給事中後入
湖南為李定國所害

姚汝明

夏邑人崇禎時由舉人知蠡縣歲飢且疫汝
明寬徭緩賦給椹掩骼民戴頌之陞河間同

知殉
難

黃承宗

威海衛人崇禎時知慶都恤民
愛士修學繕城後遇難殉節

沈迅

萊陽人崇禎辛未進士授蠡縣令
丙子邊警迅盡力守禦邑賴以全

鄭延任

臨清人崇禎中知安肅縣丙子城破
同妻自縊死百姓從死者八十餘人

耿三麟

靈壽人崇禎時任安肅教諭丙子邊警
率衆登陴死守及城陷死之事見忠節

何復

字見元平度州人崇禎初進士官工部郎有
直聲以忤內官出知保定甲申三月流寇北

犯道路阻塞復單騎入境時郡丞邵宗元守城方
戒嚴聞新守至急以印授復念臨敵不更將之義
不受願同死守集諸生於郡廟講見危授命章
不三日城陷復奮起燃西洋炮擊賊不中死之

邵宗元

字景康，碭山貢生。任保定同知。甲申三月，流賊破固關，宗元方攝府篆，集紳士嚴城守。督

師李建泰聞京師陷，諷之降宗元。慷慨責之，與新守何復協心死守城。陷，罵賊遇害。手猶持印不解。賊斷其指，抉之去。何邵忠烈人，比之張許焉。

李獻明

保定推官。以查閱兵餉，抵遵化北兵猝至，或

安有舍此他適者，城陷偕餉司何天球知縣徐澤同死之。

本朝

胡延年

字蒼恒，光州人。以功貢為戶部郎。順治七年，知保定府。郡猾數輩跳身旗下，詭民田為已

產。官吏莫敢誰何。有崔具望者，尤狡而克民。訴於部，檄鞫實。延年率所屬會質於明倫堂，以國法鬼

神休之具望不以為意延年大憤仰嘆曰天實為之謂之何哉語未畢風起空中有似聲挺擊者具望大呼乞命立殂民額手稱快撰冥擊錄以記其事陞陝西洮道副使

武國楹

奉天人知保定府水心介節善政及民其尤著者民間墳墓圈入旗地不復容子孫葬祭時祭掃本家立榜不許攔葬阻祭民咸頌德焉祀

名宦

常大忠

字二河順治壬辰進士康熙三年任保定府同知端嚴有守初建忠烈祠於西郊祀甲申

諸盡節者無何疾作聞完縣大裨傾囊助賑及卒櫬不能歸郡人感思不置祀名宦

宋基

商邱人保定府同知職司捕盜嚴保甲慎緝捕常冬日出巡遇貪士衣葛解囊以賑仍勤

勉之祀
名宦

郭宸鄂

涇陽舉人順治十二年知清苑縣性廉而謹賦無羨金獄有茂草遇事挺然上官不能折

居恒蔬布無異寒素以憂歸去之日羸馬一婢一僕一行李蕭然邑人立碑思之

馬上及

字翰明山西拔貢生順治年知滿城縣治尚嚴明政崇大體於講學勸農寬徵清役諸善

政毅然力行始終如一及歸囊篋蕭然邑人泣送

余允光

奉新舉人順治十八年知滿城縣建義學十三區買田以供館穀移奎樓於巽方登賢書

者不絕

裴國楨

奉天官生知滿城縣勤於民事捐資修葺學官縣治及城隍廟於農隙鳩工不以累又纂

輯縣志在任六年士民懷之

朱元春

莆田舉人知滿城縣勸農桑恤貧困考最陞御史元春性至孝其任滿城也迎母奉養政

暇則承歡子舍定省無間云

朱宏憲

字守謙全椒舉人知完縣懲健訟均力役招流移課茂才以古循良自勗上官役民或非

分宏憲輒堅拒不應民德之

閻興邦

宣府前衛舉人知新城縣革里書之弊丁銀令民自納息訟勸耕捐俸修學陞通州知州

士民涕泣留之不得康熙十三年祀名宦

姚文燮

桐城人順治己亥進士知雄縣大水後民多流徙文燮招徠撫綏復業者予以荒地墾種

捐資修築城垣堤岸詳免水荒租稅修學課士造就人材邑志殘缺力為蒐訂士民仰之未幾以循

卓

內名康熙三十八年祀名宦

趙士麟

字玉峰河陽人康熙甲辰進士知容城縣以正人心敦風俗為務建書院與諸生講論輯

其語為敬一錄揭教約十二則共相砥礪邑有不便於民者二十事力請除之范陽盜起士麟密訪

其聚處牒安肅合兵殲

捕畿南以安祀名宦

鄭昱

黃岡人康熙庚戌進士知唐縣性廉潔苞苴不行革除火耗縣庠序傾圮學宮賃居民舍

城垣亦皆頽毀捐俸修築煥然一新立文會親與諸生講解至今科第不乏行取授給事中祀名宦

畿輔通志卷六十八